

M116: Voraue Joseph (Bücher Mosis 2)

0,1 Iacob puwen began .
0,2 in deme lande ze chanan .
0,3 daz lant was guot .
0,4 iz par wucheres genuoc .
0,5 sine sune
0,6 gingen mit deme uihe .
0,7 da wart iosep innen .
0,8 n eiz waz unrechter minne .
0,9 der sine bruoder spulgten .
0,10 daz man nine sol melden .
0,11 daz taten der diwe barn .
0,12 daz was in an geborn .
0,13 Sineme uater er sagete .
0,14 waz er gesehen habete .
0,15 sin uater hiz in sin stille .
0,16 uirmiden solch gechelle .
0,17 do gesvichte er .
0,18 er ne redet iz niht mere .
0,19 Iosehp was uil shone .
0,20 er ne vpte necheine honde .
0,21 durh daz minnote in .
0,22 sin uater uur alle brudir sin .
0,23 Sinen roch er ime scuf .
0,24 der ime gi an den scuh .
0,25 mit phellel bestalt
0,26 des frovte sich der helt palt .
0,27 Do di brudir daz gesahen .
0,28 do si heim chomen .
0,29 daz er in einen .
0,30 uur si alle wolden meinen .
0,31 mit aller slahte minne .
0,32 do begunden si ime irbunnen .
0,33 noh ne mohten uor hazze .
0,34 in mit guote gruzen .
0,35 Porlanc ez do ne stuont .
0,36 e iosehp sah einen trovvm guot .
0,37 der trovvm was uile here .
0,38 er wart in allen ware .

0,39 er chom sin selbe in not .
0,40 er wart dar umbe uirchovfot .
0,41 Also do chom der tac .
0,42 sinen uater unde sine bruder er bat .
0,43 daz man ime uirname .
0,44 waz ime ze trovme chome .
0,45 Der uater hiz in ez sagen .
0,46 er chot er ne solt ez niht uirdagen .
0,47 Iosehp sprah do .
0,48 uil gutlichho .
0,49 “Nu tuot is kovme .
0,50 wi mir chom ze trovme .
0,51 daz wir ze uelde gingen .
0,52 garbe an deme acker zesamene truogen .
0,53 do gestunt div mine
0,54 uil herisken .
0,55 di ewwere da umbe stunden .
0,56 zuo der minen si sich neicten .”
0,57 Di bruoder sprachen inne des .
0,58 er huobe sich ze chunege .
0,59 er wolde gewis sin .
0,60 daz er ir herre solde sin .
0,61 Des trovmes er inkalt .
0,62 der nit wart in uber uil manecfalt .
0,63 Ime trovMOTE mere .
0,64 uon grozer ere .
0,65 den trovM ne wolte er uirsvigen .
0,66 wande er ne kund ez uirmiden .
0,67 er mus ez zellen .
0,68 daz ime got . ruhte ze offenen .
0,69 Do si zesamene chomen .
0,70 er bat daz si ime horten .
0,71 ich weiz si ime gesvieten .
0,72 unze si den trovM gehorten .
0,73 [...] [...]
0,74 [...] [...]
0,75 “Ich weiz mich beduchte .
0,76 do ich mines slafes bruhte .
0,77 wie sunne unde mane .
0,78 zuo mir chomen .
0,79 vnde eilif sternen .
0,80 uone himele verre .
0,81 unde sich svoze .
0,82 buten zuo minen fvozen .”
0,83 Den uater wunder nam .
0,84 waz daz solte bezeichinen .
0,85 do sprah er ime zvo .
0,86 ettewaz rafsliche .

0,87 “Wande ich unde din muter .
0,88 ioh dine bruoder .
0,89 noh hie in erde .
0,90 din durftig werden .”
0,91 daz muose so irgen .
0,92 vber siner bruodere willen .
0,93 sie heten in gerne floren .
0,94 ne wolte in got niht bewaren .
0,95 Di gingen in muote .
0,96 sines uihes huoten .
0,97 unde waren stunde .
0,98 daz si ime heim ne wanten .
0,99 Do is den uater belangote .
0,100 er bedaht ez in sineme muote .
0,101 waz daz meinen solte .
0,102 daz ir nehein widere ne wolte .
0,103 iosehp ir ruofte .
0,104 uil shire er ime antwrte .
0,105 Do sprah iacob .
0,106 ze senem sune iosehpe .
0,107 “Du wenecicz min kint .
0,108 ich ne weiz wa dinei bruder sint .
0,109 nu genc du frage .
0,110 wi ir dinc ware .
0,111 mich ist michel uuunder .
0,112 ob ir deheiner si gesunder .
0,113 so du si uindest .
0,114 uil shire du mir kundest .
0,115 wi ste ir dinc .
0,116 nu ile min truot kint .”
0,117 Do iosehp uil palde livf .
0,118 ze sichem in daz tal tivf .
0,119 wande da was der weide genuoc .
0,120 unde was div selbe ovh guot .
0,121 Do sah in da ein man .
0,122 hinnen unde ennen irre gan .
0,123 der fraget in ub er ime sagen geruohte .
0,124 waz er da suhte .
0,125 Er chot er suohte sine bruoder .
0,126 wa si hiltin ir chorter .
0,127 der man chot er horte si sprachen .
0,128 si wolten ze dothaym .
0,129 Er streic nah in .
0,130 unde uant si ze dothaim .
0,131 Also si in uerriste ane sahen .
0,132 ze einanderen si sprachen .
0,133 “Sehet ze deme trovmare .
0,134 er pringet nivmare .

0,135 Slahe wir den selben hunt .
0,136 unde werfen in an dirre cisternen grunt .”
0,137 unde choden daz den selben uirwazen .
0,138 dev wilden tir frazen .
0,139 so wirt denne wole shin .
0,140 waz ime di trovme frume sin .
0,141 Daz uirnam ruben .
0,142 er bat di rede lazen sten .
0,143 “niht slahe wir in .
0,144 werfen in in di cisternen .
0,145 wir sulen unsere hende .
0,146 behalten ane di sunde .”
0,147 er wolte in gerne nerigen .
0,148 deme tode werigen .
0,149 ob er in so bename .
0,150 daz er sineme uater widere chome .
0,151 Also er zu in chom .
0,152 uil shire si in ane sprungen .
0,153 unsanfte si ime zu sprachen .
0,154 den roch si ime abe prachen .
0,155 si taten ime uobeles stoze .
0,156 ioh slege groze .
0,157 si lizen in in eineme wazzergademe sitzen .
0,158 unze si inbizzen .
0,159 unze si [...] [...]
0,160 in irsluogen oder irwurcten .
0,161 Ich weiz si in allen gahen .
0,162 chovfluote gesahen
0,163 di uurten mislich gewant .
0,164 si wolten in egyptolant .
0,165 Do sprah iudas .
0,166 der dir beste undir in was .
0,167 “zu wiv ist uns daz guot .
0,168 daz wir unserem bruder tuon den tot .
0,169 so uorderet uns got
0,170 sin pluot .
0,171 welt ir z an minen rat lazen .
0,172 ir megit sin palde genizen .
0,173 gebet in den chovfluoten .
0,174 lat si in ev gelten .
0,175 noh ne bewellet ever hende .
0,176 mit mortlichen sunden .
0,177 er ist unser lichname .
0,178 des sul wir tuon ware .”
0,179 Der rat duohte si guot .
0,180 shire wart er uirchovfot .
0,181 umbe zveinzec phenninge .
0,182 di teilten di zehen iungelinge .

0,183 Di in da chovften .
0,184 di hizen in mit in gen .
0,185 do muose daz kint lussam .
0,186 ellende werden .
0,187 er shit mit riwen
0,188 uon den ungetriwen .
0,189 mit gebundenen armen .
0,190 daz mahte got irbarmen
0,191 manegen zaher er da li .
0,192 da er after wege gi .
0,193 Do ruben zu der gruoben chom .
0,194 unde in ni mahte uinden .
0,195 sin gewate . er zarte .
0,196 uil luote er harte .
0,197 “we min .
0,198 wa solt du sin .
0,199 waz mac ich weniger man .
0,200 disses leides tuon .”
0,201 Ein chizze si sluogen .
0,202 uil gare si z benuogen .
0,203 den iosepes roch
0,204 stizen si in daz pluot .
0,205 ir uater si in santen .
0,206 ob er in irchante .
0,207 daz er sahe .
0,208 ob er sines sunes ware .
0,209 si sprachen daz si in uunden .
0,210 sam in ein tir hete uirslunden .
0,211 Also in der uater gesah .
0,212 uil riweclichen er sprah .
0,213 “der roch ist mines kindes .
0,214 so we mir sines todes .
0,215 daz min got so hat uirgezzen .
0,216 daz in dehein tir solde frezzen .”
0,217 Sin gewate er zezarte .
0,218 uil parmechen er harte .
0,219 “nu muoz ich imer weinen .
0,220 den minen liben weisen .”
0,221 Do di sune chomen .
0,222 zuo ime gingen .
0,223 so si in i trosten mere .
0,224 so ime i wirs tet daz ser .
0,225 er chot weinente .
0,226 er muose chisen den ente
0,227 di ioseben chovften .
0,228 do si in z egyptelande brahten .
0,229 si uirchovften in sare .
0,230 ze einem herre hiz butifar .

0,231 der was ein gewaltic man .
0,232 deme was daz here undertan .
0,233 durch sine lussame .
0,234 nam er in ze man .
0,235 Do ioseph got ane ruofte .
0,236 uil wole er in horte .
0,237 wole ime spuote .
0,238 sva er dinote .
0,239 selbe was er erlich
0,240 elliv sin gebare was zuthlich .
0,241 in allen dev daz er tet .
0,242 so hete er gute site .
0,243 got gab ime franspuote .
0,244 in allen div und er bestunt .
0,245 uile zites hine quam .
0,246 e in sin herre sazte ze ambetman .
0,247 al daz er hete .
0,248 daz beualch er al ze siner gewelte .
0,249 daz ime alle di wurden undertan .
0,250 di ime solten dinen .
0,251 niht er uz nam .
0,252 wan sin wip lussam .
0,253 Do er z ambahte gewan .
0,254 do wart er also er gote zam .
0,255 gut unde genadich .
0,256 des wart er salich .
0,257 deme livte er rihte .
0,258 mit getruolicheme erniste .
0,259 er gebot daz niht bestunde .
0,260 neheineme armen siner phruonte .
0,261 abe deme pumanne
0,262 er niht in nam .
0,263 mit unrehteme gedingen .
0,264 noh mit deheineme gedvange .
0,265 niwan sin rehtez dinest .
0,266 daz duht in allerruoste .
0,267 der ime daz gab .
0,268 deme uirgab er iovh so er in izz bat .
0,269 uone div gi der gotes seggen .
0,270 uber allez des er solde phlegen .
0,271 di livte waren salich .
0,272 erde ioh uihe uil parich .
0,273 Ua got selbe was puman .
0,274 waz mahte da ubele wucheren .
0,275 Vnder alleme deme guote .
0,276 gab got iosebe ze muote .
0,277 daz er ime an deme gewalte .
0,278 mere mezzes ne geualchte .

0,279 niwar daz durri prot .
0,280 dar zuo tranch er wazzer guot .
0,281 unde was er idoh also shone .
0,282 same dev wunnesamiv pluome .
0,283 daz alle di wunder nam .
0,284 wannen er ware so wol getan .
0,285 Under der menege .
0,286 gebarot er gelich eineme helede .
0,287 so er was gesvase .
0,288 so hete er mit gote gechose .
0,289 so beualch er ellev dev dine sin .
0,290 an unseren trehtin .
0,291 daz er in behuote .
0,292 in aller siner note .
0,293 noh in sineme ellende .
0,294 ubir in ne gestatte dehaineme sineme uiende .
0,295 Got gewerte in des .
0,296 unde anderes uile maneges .
0,297 niwar daz er ime idoh tete .
0,298 so i was sin site .
0,299 daz er in besuohte .
0,300 vb er an ime gezviuelote .
0,301 Do z iosep so wole ane ui .
0,302 unde ime an nihte missegi .
0,303 do begund er siner frowen lichen .
0,304 si wolte in besvichen .
0,305 si begunde tovgen .
0,306 an in werfen di ovgen .
0,307 si tet wider in di gebare .
0,308 di ime waren unmare .
0,309 si begunde in spenen .
0,310 unrehtes wenen .
0,311 des si ne tohte .
0,312 obe si uone gote mahte .
0,313 Do si z langer ne mohte uirhelen .
0,314 do begunde si ze ime spilen .
0,315 dev selbe wirwazene .
0,316 bat in mit ir slafen .
0,317 Sin antwurte was zuhtlich .
0,318 dev rede duhte im umpillich .
0,319 er chot “wi maht ich imer so ubele getuon .
0,320 oder mines gotes so uirgezzen .
0,321 daz ich di untriwe tate .
0,322 der mich gechovfet hete .
0,323 svi ich ware sin scalch .
0,324 der mir allez sin guot beualch .
0,325 unde alles des ist ungewizzen .
0,326 des er hat besezzen .

0,327 ni war so uil
0,328 so ich es ime geben wil .
0,329 ich walt es alles .
0,330 got irlaze mich sulehes ualles .”
0,331 Vil mohte si sich muon .
0,332 er ne wold es niht tuon .
0,333 uile mohte si sich pelgen .
0,334 er ne wolte ir niht uolgen .
0,335 daz huor er uirmeit .
0,336 des chom er in groz arbeit .
0,337 Eines tages daz gescah .
0,338 daz si in einen uant .
0,339 tuon ne weiz waz werches .
0,340 da er nimannes zuo ne bedorfte .
0,341 si wande ez ware ir wole irgangen .
0,342 daz si da ne sach nimannen .
0,343 Si hiz in daz werch lazen sten .
0,344 unde hiz in mit ir gen .
0,345 si chot “slaf mite mir .
0,346 wole lone ich es dir .”
0,347 Er weigerote .
0,348 si bat in uil genote .
0,349 do si in nehein ente .
0,350 mohte uberwinten .
0,351 bi deme lachchen si in ui .
0,352 uil shire er z uirli .
0,353 uoz deme huose er floh .
0,354 sinen wech er uon ir zoh .
0,355 Also er ir intran .
0,356 unde er ir li daz lachen .
0,357 unde si wart innen .
0,358 daz er sie niht wolde minnen .
0,359 si begunde wuofen .
0,360 den liuten ze ruofen .
0,361 Do si irchomen .
0,362 si bat si ire horen .
0,363 “ewer herre hat wol getan .
0,364 daz er gewan einen ebreisken man .
0,365 der ane mich wolte lovfē .
0,366 unde wolte mich honen .
0,367 Er zogete mich
0,368 uil unpilliche .
0,369 ne hete ich gehart
0,370 er hete mich inpart .
0,371 unde hete mich gehonet .
0,372 nu sehet wi er ime hete gelonet .
0,373 Also ich rif .
0,374 daz lachen er mir hi liz .

0,375 da bi muget ir sehen .
0,376 waz hi ware geshehen .
0,377 ob ich gesvictē .
0,378 do er mich zogete .”
0,379 Do der herre chom .
0,380 unde si im z begunde zellen .
0,381 unde si ime zeicte daz lachen .
0,382 waz mohte iosep da widere gesprechen .
0,383 unde er gelovpte sineme wibe .
0,384 also sin selbes libe .
0,385 Er hiz in in den charchare werfen .
0,386 undir di uirworhten .
0,387 ane sine sculde .
0,388 florn het er sine hulde .
0,389 Do begund ez got irbarmen .
0,390 daz si so quelten den armen .
0,391 er gab deme ze muote .
0,392 der des charchares solde huoten .
0,393 daz er iosebe wart genadic .
0,394 des wart er uile salic .
0,395 Er begunde in minnen .
0,396 er ne wolte in niht dvingen .
0,397 er beualch ime durch sine guote .
0,398 alle di da waren in der note .
0,399 daz er si beginge .
0,400 svi so ime geuile .
0,401 wande er was innen worden .
0,402 daz er in werchen unde in worten .
0,403 al nah gote meinete .
0,404 svas so er besheinete .
0,405 Do in allen gahen .
0,406 zvene wider den chunic missetaten .
0,407 ein phister unde ein schenche .
0,408 si muosen in daz gebende .
0,409 in den charchare man si warf .
0,410 in daz gebende uil starch .
0,411 Iosebe wurden si beuolehen
0,412 er ne li si niht svellen .
0,413 er gab in maz ioh tranc .
0,414 er dinote in gote danc .
0,415 er begi si genote .
0,416 mit sviv er hete .
0,417 Do di selben herren .
0,418 lange da gewaren .
0,419 eines nahtes daz gescah .
0,420 daz ir iwederer einen trovvn gesach .
0,421 wi sin dinc solde irgen .
0,422 der chunich hete si unsanfte besten .

0,423 si waren in sorgen .
0,424 waz ir solte werden .
0,425 si waren unfro .
0,426 iosep sprah in zuo .
0,427 “Ia ir guten knehte .
0,428 ez vert umbe evh unrehte .
0,429 ir gehabet evh hivte ubele .
0,430 iz ne zame niht adele .
0,431 saget mir waz ev si .
0,432 unde weset biderbe da bi .”
0,433 Si sprachen do .
0,434 ettewaz truerclicho .
0,435 “svare ist uns getrovmet .
0,436 leider niman iz uns irsheidet .”
0,437 Iosep antwurte in
0,438 “got . der scol evh trosten .
0,439 waz ob ir mir sagetet .
0,440 waz ev ware geshehen .
0,441 daz ich iz irshide .
0,442 also ez irginge .”
0,443 Do sprach der shenche .
0,444 mislich waren sine gedanche .
0,445 “Do ich hinet was insvebet .
0,446 in micheler . unhabe
0,447 do sah ich dri winrebe .
0,448 prozzen unde pluogen .
0,449 ze zitegin pergen sich machen .
0,450 Do chom mir shire .
0,451 des chuneges pechare .
0,452 den nam ich in di hant .
0,453 di pere ich dar in dvanc .
0,454 deme chunege ich ez truc .
0,455 necheines arges er her zuo mir gewuoch .”
0,456 Iosep ime antwurte .
0,457 nah rehteme geuerte .
0,458 “so wol mich des trovmes .
0,459 uber dri tage du gedingest .
0,460 der chunic din gedenchet .
0,461 uil shire er nah dir sendet .
0,462 er uirchuoset dine sculde .
0,463 unde git dir sine hulde .
0,464 leides er dich irgezzet
0,465 an din ampahte er dich setzet .
0,466 den pechare du ime butest .
0,467 also du e gewonetest .
0,468 Sih daz du min nine uirgezzest .
0,469 so du an dineme gewalte gesizzest .
0,470 unde dir wole si

0,471 so gedenche wi mir hi si .
0,472 Ich wart inzucchet .
0,473 in dizze lant uircovfet .
0,474 ane mine schulde .
0,475 flos ich mines herren hulde .
0,476 do warf man mich sare
0,477 in disen charchare .
0,478 in dise uinstere grube
0,479 nu tu du ez gote ze libe .
0,480 du rat deme kunige .
0,481 daz er mir genade .
0,482 daz er mich hinnen lose .
0,483 e ich den lip uirlise .”
0,484 Do der phister uirnam .
0,485 wi er di trovme chund ersheiden .
0,486 er chot ovh er sahe .
0,487 do er insvebet ware .
0,488 obe sineme hovbet dri zeine .
0,489 mit melewe uolle .
0,490 unde in der oberesten ware .
0,491 aller der brote gebare .
0,492 di i dehein phister chunde gemachen
0,493 di nam uoz melewe scolte pachen .
0,494 unde iz di uogeles gare frazen .
0,495 daz si s niht uirlizen .
0,496 Iosep antwurte ime des .
0,497 “acch ah dines trovmes .
0,498 der driger zeine .
0,499 muost du wole weinen .
0,500 uirnim waz ich dir sage .
0,501 di dri zeine sint dise dri tage .
0,502 der chunic dannen gebuotet .
0,503 daz man dir abe sleht din houbet .
0,504 er haizzet dich an den galgen hahen .
0,505 da beginnent dich di uogeles asen .
0,506 niht si din uirleibent .
0,507 gare si dich zezanekent .”
0,508 der dri tage gelach .
0,509 des chuneges geburttag .
0,510 michel wirtschafft er hete .
0,511 undir aller siner diete .
0,512 da begunde er gedenchen .
0,513 des sines schenchen .
0,514 er bedahte sine not .
0,515 daz er ime uil hete gedinot .
0,516 Er ehiez in ime pringen .
0,517 do muose er wole gedingen .
0,518 er chot alle sine schulde

0,519 er ime uirgabe . unde er wolte
0,520 daz er wider waege Sines ampahtes phlage .
0,521 Den phister hiz er uahen .
0,522 hovpten unde hahen .
0,523 da muosen in di uogele asen .
0,524 also ime was gescheiden .
0,525 Do der scenche daz ambahte besaz .
0,526 sines trovmes sheiden er uirgaz .
0,527 er uirgaz triwen .
0,528 ioh maneger riwe .
0,529 di er in deme charchare leit .
0,530 e ime iosep den trovme shiet .
0,531 der in azte unde trancte .
0,532 pettote ime sanfte .
0,533 der scenche des uirgaz .
0,534 do sin dinc begunde sten baz .
0,535 Dannen uber zwei iar .
0,536 gesah der chunic uile her .
0,537 einen troune svare .
0,538 den saget er den herren .
0,539 den chunde nehein man .
0,540 rehte gescheiden .
0,541 noh under deme liute .
0,542 waz der trovme duote .
0,543 Do begunde der scenche .
0,544 sines trovmes gedenchen .
0,545 er sprach zuo deme chunige .
0,546 “herre uirnim min ubele .
0,547 wi mir ist geschehen .
0,548 des muoz ich dir iehen .
0,549 Ich unde din phister .
0,550 lagen in charchares uinstere .
0,551 da beualch man unsich inne .
0,552 eineme ebreishen iungelinge .
0,553 der tet uns al daz guot .
0,554 daz ime got gebot .
0,555 Do z eineme male .
0,556 getrovme uns beiden svare .
0,557 des begunde wir truren .
0,558 er begunde unsich trosten .
0,559 wir sageten ime di trovme .
0,560 di irshit er uns palde .
0,561 er chot daz ich dine hulde gewunne .
0,562 unde daz man den phister hinge .
0,563 Der iwederez wart .
0,564 nehein wort uirwandelet wart .
0,565 mich pat er genote .
0,566 daz ich sin wider dich gewuoge .

0,567 daz ich dir chunte .
0,568 daz er ware ellende .
0,569 ime heten gemahchet lügenare .
0,570 daz er ware .
0,571 geworfen in den charchare .
0,572 daz tu durh dine guote .
0,573 in namest uzer note .”
0,574 Der chunic gebot .
0,575 man brahte ime den man guot .
0,576 daz man in batete unde share .
0,577 watote shire .
0,578 Also er in gesah .
0,579 ich weiz er ime zu sprah .
0,580 “ich mac wole iehen .
0,581 daz ich stanche trovme han gesehen .
0,582 di ne wolte ich melden .
0,583 niman wan minen holden .
0,584 under den ne uant ich niman .
0,585 der mir si chunde gescheiden .
0,586 Do saget man mir .
0,587 ob ich si gezalte dir .
0,588 daz da niht uore ware .
0,589 du ne sagetest mir svaz dar uz geschahe .”
0,590 Do sprah iosep .
0,591 “des ne uirmizze ich mich niht .
0,592 got antwurte deme chunege .
0,593 fransmuote an minen sheiden .
0,594 Gerne wil ich daz uirnehmen .
0,595 waz ime in trovme si zuo chomen .”
0,596 er ne redete niht mere .
0,597 do sprah der chunic here .
0,598 “Ich weiz mich beduhte .
0,599 do ich mines slaues bruhte .
0,600 wi ich eine stunde .
0,601 an eines stades reine .
0,602 Do gingen voz der ahe .
0,603 siben chuo rade .
0,604 ueizte unde shone .
0,605 si gingen an daz gras gruone .
0,606 an der wise .
0,607 gingen si mit frowde .
0,608 Daz stund unlange
0,609 e andere sibene chomen ennen .
0,610 magere unde unshone .
0,611 ich ne gesah ni wirs getane .
0,612 di ueizte si frazen .
0,613 den hunger doh niht gebuzten .
0,614 an in nieder ne shein .

0,615 ob si inbizzen der ueizte dechein .
0,616 Des trovmes ich inspranc .
0,617 do ne stunt iz porlanc .
0,618 e mir was sam ich sahe .
0,619 da uoze an der sate .
0,620 in deme tvalme .
0,621 wahsen an eineme halme .
0,622 siben eher shonev
0,623 unde vollev .
0,624 da nach sah ich sibenev .
0,625 slahchev . unde durriv .
0,626 di uollen si ane scrihten .
0,627 uil shire si si uirslihten .”
0,628 Do sprah iosep .
0,629 “dizze n ist trugenheit niht .
0,630 der chunic sach eine .
0,631 di gotes tovgen .
0,632 er geruohte ime offenen .
0,633 daz er wil stiften .
0,634 des n ist zviuel nechein .
0,635 di trovme sin beide inein .
0,636 Di siben rinder ueizt .
0,637 ioh dev siben eher uollev .
0,638 daz sint siben iar guotev .
0,639 alles rates uollev .
0,640 so ni bi mannes geburtes .
0,641 neheinev bezzeriv wurten .
0,642 ni ne wart der geborn .
0,643 bi deme baz wurte fleihs unde chorn .
0,644 ole noh win .
0,645 wi mohten si do bezzer sin .
0,646 Da nah chomen sibenev .
0,647 so freislichev .
0,648 daz lutzel lute bestet .
0,649 ez ne lige allez tot .
0,650 Do daz chorn zvirot .
0,651 so ist shire daz uihe uur braht .
0,652 so muozen si svellen .
0,653 uor hunger chollen .
0,654 wi mohte in wirs sin .
0,655 so muzen si sterben .
0,656 Uvil du mines rates ruochen .
0,657 du sult einen gewissen man suchen .
0,658 der nah dir daz lant .
0,659 habe in siner hant .
0,660 deme daz livt si undertan .
0,661 der sezze sinen ambetman .
0,662 uber igelich guot .

0,663 uber chorn unde howe .
0,664 di in disen sibem iaren .
0,665 daz niht uirmsmahen .
0,666 si ne heizen manneclich an sin seil .
0,667 fazzen sines chornes daz finfte teil .
0,668 trag ez zuo froneme stadele .
0,669 oder uur ez uf sineme wagene .
0,670 man scol ez fronen .
0,671 da mite sol man den hunger honen .
0,672 so z tveren beginnet
0,673 daz niman niht in uindet .
0,674 so scolt du da mite helfen .
0,675 geben unde uirchovfen .
0,676 so geniset dir daz livt
0,677 daz wirt dir dar nah liub .
0,678 so mac man dir gesam .
0,679 so dunchet ez mich wol getan .”
0,680 Do sprah der chunic uberlivot .
0,681 daz horte manec sin truot .
0,682 “ja ne mege wir niht uinden .
0,683 deheinen man des gotes geistes so vollen .
0,684 so mich dunchet dirre man .
0,685 der mine trovme so hat irsheinen .
0,686 Ich ne weiz in miner gewalt .
0,687 weder iungen noh alt .
0,688 der dir si gelich
0,689 uon dev so wil ich .
0,690 daz tu nah mir sist .
0,691 der allerheriste sist .
0,692 livtes unde landes .
0,693 daz du sin alles gewaltes .
0,694 Nimen si so riche .
0,695 er ne sule dir intvichen .
0,696 tuon al daz du gebutest .
0,697 oder svaz du si lazest .
0,698 ot ich heize der herre .
0,699 ich ne gere sin niht mere .
0,700 des stules unde des namen .
0,701 sculen si mich uore han .”
0,702 Der chunic here .
0,703 sprah zuo iosepe mere .
0,704 “nu han ich dich gewaltic getan .
0,705 uber al daz ich han .”
0,706 Daz fingerlin er nam .
0,707 ab der siner wolgetan hant .
0,708 im er z ane legete .
0,709 zuo deme gewalte er in stabete .
0,710 Ich weiz er in ane watete .

0,711 einen saben guten .
0,712 umbe sinen hals einen bovch .
0,713 der was aller golt .
0,714 er hiz in sitzen uf sin gereite .
0,715 after der burc leiten .
0,716 daz sine boten uore gingen .
0,717 gebuten daz man in inphinge .
0,718 daz si ime alle chniten ingegene
0,719 also ingegen deme chunege .
0,720 Der chunic sprah mere .
0,721 durch iosebes ere .
0,722 “Ich pin pharao .
0,723 da horet ev alle zuo .
0,724 niman ne wege sinen fuoz noh sine hant .
0,725 uber allez dize lant .
0,726 unde si uil stille .
0,727 ez ne si iosebes wille .
0,728 ich ne wil ovh niht .
0,729 daz er heize iosep .
0,730 er heizet pillicher .
0,731 der werlt heilare .”
0,732 Do tet er in gehit .
0,733 er gab ime ein rich wip .
0,734 eines piskoffes tohter .
0,735 div was ane laster .
0,736 Drizec iare was er alt .
0,737 do ime der chunic gab den gewalt .
0,738 do uur er showen .
0,739 wi daz lant ware gebuwen .
0,740 uil wole er berihte .
0,741 ein igelich ambahte .
0,742 al daz dehein man .
0,743 ze puowe solte haben .
0,744 des ne hiz er niht uberheuen .
0,745 man muse im ez geben .
0,746 in igelicheme amphahate .
0,747 sine stadele er rihte .
0,748 da er inne gehilte .
0,749 daz chorn . daz er irsparte .
0,750 Siben iar do chomen .
0,751 al nah einander .
0,752 so di altesten iahen .
0,753 daz si ni bezzerev gesahen .
0,754 in aller slahte genuhte .
0,755 daz ez niman gestetenen mahte .
0,756 chorn wart uber maze .
0,757 same wart obezes vazze .
0,758 uihes ne wesse niman zale .

0,759 oles unde wines heten si wale .
0,760 Iosep nine tvalte .
0,761 e er sine stadele geladete .
0,762 er samenote . ez genote
0,763 ze der chunftigen note .
0,764 er wisse wole wi ez irginge .
0,765 so der iare wurde ende .
0,766 daz er s so ne gehurte .
0,767 so uil so er s bedorfte .
0,768 Dev sin shone . chone
0,769 gewan ime zvene sune .
0,770 den si gewan e .
0,771 den hiz er manasse .
0,772 er chot nu ime got hete gegeben kint .
0,773 er hete in aller siner arbeite irgezzet .
0,774 Den anderen sun .
0,775 nante er effraym .
0,776 er was uil fro .
0,777 daz er so uile sah sines wucheres .
0,778 er wolte sich menden .
0,779 daz si ime got hete gegeben in ellende .
0,780 Ich sage ev ze ware .
0,781 do uur wurden dev guten iar .
0,782 do besaz dev erde .
0,783 da ne wolte niht ane werden .
0,784 michel wart dev not .
0,785 daz uihe lach allez tot .
0,786 der hunger gi uber al
0,787 des livtes wart ein groz ual .
0,788 Di auer do genaren .
0,789 zu deme chunege si chomen .
0,790 si baten in helfen .
0,791 daz si niht gesvullen .
0,792 Er hiz si ze iosebe uaren .
0,793 er chot der solte si bewaren .
0,794 Iosep hiz daz chorn dresken .
0,795 lutzal machen z ezzen .
0,796 er hiz ez gewarlichen handelin .
0,797 di ez wolten wandelen .
0,798 den armen da mite helfen .
0,799 ze den richen uirchovfen .
0,800 er forhte daz ime zerunne .
0,801 durh daz was er da obe so enge .
0,802 ime waren michele sorgei .
0,803 ze den siben iaren uirborgem .
0,804 Der hunger sich preite .
0,805 in di werlt so wite .
0,806 er gi uber al .

0,807 daz livt starb unde sval .
0,808 Nimen ne dorfte sain .
0,809 der z ioh mohte geleisten .
0,810 wande ime ne galt daz uelt .
0,811 wuocher noh sa sines samen gelt .
0,812 Do iacobe chom mare .
0,813 daz daz chorn in egiptelande uaile ware .
0,814 zuo sinen kinden er chot .
0,815 “wi tut ir so wer got .
0,816 daz ir des hungeres sult cholen .
0,817 noh daz chorn in egipte niht wellet halen .
0,818 ia ist ez da ueile .
0,819 uart guter heile .
0,820 ia habe wir scaz genuoge .
0,821 ze wev sule wir der be sterben .”
0,822 Si huben sich alle insamt .
0,823 unde uuren in egiptelant .
0,824 beniamin bestunt heime .
0,825 sineme uater ze govmele .
0,826 er forhte ime ettewaz geshahe .
0,827 ob er uon ime chome .
0,828 zu ime er in sazte .
0,829 daz er in iosebes irgazte .
0,830 Vo si alle einleue .
0,831 chomen ze houe .
0,832 da iosep unde andere sazen
0,833 da buten si sich ime ze fuozen .
0,834 Vil shire er si irkante .
0,835 an deme gesprache unde an deme gewante .
0,836 er fragete si wer si waren .
0,837 oder wannen si uuren .
0,838 Si sprachen “von Chanaan .”
0,839 unde ware sune eines manes .
0,840 Er nam es wole govme .
0,841 do daht er an di trovme .
0,842 wi dev sunne ioh der mane
0,843 uuren uon himele shone .
0,844 ioh einlef sternen .
0,845 zu sinen uuozen sich neicten .
0,846 Do mahte er in lonen
0,847 svas so si ime getaten .
0,848 do begund er si besuchen .
0,849 ob ez si iht wolte riwen .
0,850 er chot in duhte an ir gebare .
0,851 wi si waren spehare .
0,852 si wolten daz lant uirraten .
0,853 er muose daz behuoten .
0,854 es buten ir unsculde .

0,855 al nah siner hulde .
0,856 si chomen in daz lant .
0,857 durh hungeres gedvanc .
0,858 si waren chomen fridelichen .
0,859 niht wicliche .
0,860 Iosep sprach do .
0,861 “daz n ist niht so .
0,862 ir welt hi showen .
0,863 wa ir deme lande muget gedrowen .”
0,864 Si suhten sine genade .
0,865 daz er in uirname .
0,866 Er svicte in
0,867 also si baten in .
0,868 ir einer sprah do .
0,869 di anderen horten da zuo .
0,870 “Unser sint zvelue .
0,871 uon ein uater geborne .
0,872 uz deme lande Chanaan .
0,873 waz ob du z etewenne . hortest nennen .
0,874 der sint einleue .
0,875 hi in deme houe .
0,876 der zvelfte ist heime .
0,877 nimet sines uater govme .
0,878 er was ime uil lib .
0,879 er ne liz in mit uns niht .
0,880 unser n ist niht mere .
0,881 daz gelovb du mir herre .”
0,882 Iosep in antwurte .
0,883 “irrichlich ist ever geuerte .
0,884 ich wil ez bewaren .
0,885 ob ir sit spehare .
0,886 bi des chuneges gesunde .
0,887 ir ne chomet uz deme lande .
0,888 e ewer brudir der minnist .
0,889 in disme lande ist .
0,890 Sendit einen dare .
0,891 daz er chome here .
0,892 ir sit in gebenden .
0,893 unze wir daz iruinden .
0,894 obe daz war si .
0,895 daz der zvelfte da heime si .
0,896 ne welt ir des niht tuon .
0,897 so birt ir uz durh spehen chomen .
0,898 pi des chuniges gesunde .
0,899 ir muzet in daz gebende .”
0,900 Si heten michele clage .
0,901 in der ueste zuene tage .
0,902 Des drittes tages man si uz li

0,903 iosep zu in gi .
0,904 unde sprah er uorhte suntone .
0,905 durh daz si waren in ellentome .
0,906 obe si waren . frideliche dar chomen .
0,907 scolte in denne . da iht ubeles geshehen .
0,908 “Ane gewarehait
0,909 inchomet ir uon mir niht .
0,910 Einen wil ich pinten .
0,911 in den charchare uinsteren
0,912 ir andere uart heim .
0,913 got gebe ev gut heil .
0,914 uuoret heim ever chorn .
0,915 unde ne lat ev niht sin zorn .
0,916 ist daz war . daz ir .
0,917 einen wenigen bruder habet .
0,918 chuomet ir mir .
0,919 shire gedinget ir .”
0,920 Si taten also er gebot .
0,921 unde clageten under in ir not .
0,922 si muosen wole iehen .
0,923 daz in rehte ware geshehen .
0,924 wande si heten an ir bruder garnit .
0,925 swaz in ware begegnet .
0,926 do si sin angest sahen .
0,927 unde ime ni wolten genaden .
0,928 daz in niht ginge ze herzen .
0,929 sines ellendes smerzen .
0,930 Do sprach ruben .
0,931 der in e wolte nerigen .
0,932 “dizze sagete ich ev brudere .
0,933 do daz kint chom muodir .
0,934 mit guten triwen .
0,935 do garnot ir dise riwe .
0,936 sehet nu get durh not .
0,937 uuer uns sin unsoltdigez bluot .”
0,938 Do iosep ir rede uirnam .
0,939 er cherte sich hine dane .
0,940 der amer in dvanc
0,941 daz ime der zaher uz spranc .
0,942 Er cherte sich widere zu in .
0,943 unde hiz ir einen binden .
0,944 sinen bruder symeon .
0,945 hiz er in di not tun .
0,946 z ir aller gesihte .
0,947 tet er in in di ueste .
0,948 Er hiz di secche alle .
0,949 tun weizes uolle .
0,950 er hiz igeliches sacaz .

0,951 legen widere in sinen sach .
0,952 er hiz in ovh geben .
0,953 des si unterwegs solten leben .
0,954 Do si unterwegs chomen .
0,955 unde den rossen wolten uuoterer .
0,956 also ir einer uf tet den sach .
0,957 und gesah daz sin scaz da lach .
0,958 den anderen er sagete .
0,959 daz er sinen scaz habete .
0,960 So si z gesahen .
0,961 uil harte si irchomen .
0,962 michel wunder si nam .
0,963 wi daz solte sin getan .
0,964 heim chomen si z ir uater
0,965 der uor alter was ablager .
0,966 niht si ne tvalten .
0,967 e si z ime allez zalten .
0,968 si sprachen der herre .
0,969 der des landes phlage .
0,970 er zige si ze ware .
0,971 si waren spehare .
0,972 “Wir sprachen . fride brahte .
0,973 neheines ubeles gedahten .
0,974 unser waren zvelefe .
0,975 geborn uon einen adele .
0,976 wir waren eines mannes sune .
0,977 der minniste ware mit ime .
0,978 Als er daz gehorte .
0,979 zestete er uns drote .
0,980 wir ne chomen uz deme lande .
0,981 e wir den minnisten besanden .
0,982 Ich ne weiz weder er sich bedahte .
0,983 oder er z tet nah rate .
0,984 er hiz uns uaren .
0,985 unde habete da symeonem dinen barn .
0,986 in unser antwurte man in bant .
0,987 uile uast iewedere hant
0,988 div ros man uns uazzote .
0,989 mit weize ioh mit prote .
0,990 er hiz uns mite geben .
0,991 so dev ros maiste mohten getragen .
0,992 daz urlop man uns gab .
0,993 unde hiz uns nimer chomen in di stat .
0,994 ane unseren bruder .
0,995 der hi ware mit dir .
0,996 obe wir den gesunt wolten gehalten .
0,997 ioh symon losen uon den panten .
0,998 er chot ube auer benyamin . mit uns dare uuore

0,999 er wesse danne daz wir ne waren spehare .
0,1000 wir mohten daz lant danne .
0,1001 suchen . mit fride unde mit genaden .”
0,1002 Do si di rede uiranten .
0,1003 di secche si imbunten .
0,1004 manneclich uant sinen chovf .
0,1005 also er den sach indovh .
0,1006 zesamene si sahen .
0,1007 uil harte si irchomen .
0,1008 michel wunder si nam .
0,1009 waz got dar uz wolte meinen .
0,1010 Der uater sprach do .
0,1011 uil paremclicho .
0,1012 “Ir habet mih der chinde ane getan .
0,1013 daz muoze got irbarmen .
0,1014 Iosep ne weiz ich ware chom .
0,1015 symeon lit gebunten .
0,1016 nu sol ich senden minen weisen .
0,1017 ze des ellendes freisen .
0,1018 ia wench got der gute .
0,1019 du bedenche mine note .”
0,1020 Do sprach Ruben .
0,1021 “du scolt mir in bevelhen .
0,1022 zwene mine sune .
0,1023 gib ich dir wider ime .
0,1024 ze slahenne oder ze habenne .
0,1025 ub ich in dir widere ne bringe .”
0,1026 Do sprach iacob .
0,1027 “dizze irbarme den almahtigen got .
0,1028 nu ist iosep tot .
0,1029 diser eine mir bestunt .
0,1030 geshihet ime iht underwegen .
0,1031 so muz ich den lip geben .
0,1032 so muoz ich imer quevllen .
0,1033 unze ich so uare zuo der helle .”
0,1034 Do in uil nah zeran .
0,1035 des si e heim prahten .
0,1036 der uater sprach z in .
0,1037 z wev si niht uuoren .
0,1038 chovfen daz chorn .
0,1039 e si des hungeres wurden uirlorn .
0,1040 Do sprach iudas .
0,1041 als ez ime not was .
0,1042 Wir ne durfen dare chomen .
0,1043 ane beniamyn .
0,1044 du ne wellest dich unser irbarmen .
0,1045 umbe in einen .
0,1046 wil du in mit uns senden .

0,1047 so muge wir heim wenden .
0,1048 er ne uare .
0,1049 wir ne chomen dare .
0,1050 Der des landes ist gewaltic .
0,1051 der sprah ze lezzest .
0,1052 “niner mere gesehet mich .
0,1053 ane eweren brudir den minnisten .”
0,1054 Der uater weiz in
0,1055 daz si uirmeldoten benyamin .
0,1056 si sprachen waz si mohten tuon .
0,1057 do er si hiz fragen .
0,1058 welches chunnes si waren .
0,1059 obe si uater heten .
0,1060 oder ob si inder .
0,1061 heten einen bruoder .
0,1062 “wi mohte wir wizzen .
0,1063 ob er imen heze pringen .”
0,1064 Iudaz sinen uater bat .
0,1065 er tat ez durch got .
0,1066 er beuulhe daz kint in sine triwe .
0,1067 er chot ez ne solte in nimer geriwen .
0,1068 ob er in ime ne widere prahte .
0,1069 daz im ez got zuo suhte .
0,1070 ob er ime unsenftigez wort gesprache .
0,1071 daz ez got uber in rache .
0,1072 “La in mit uns uaren .
0,1073 laze in uns wole bewaren .
0,1074 hetest du in uns e gegeben .
0,1075 wir waren nu zvire chomen .
0,1076 waz ist dir daz guot .
0,1077 ligent uns div kint tot .”
0,1078 Do sprah iacob .
0,1079 “nu ev s ist also not .
0,1080 nu tut also ir wellet .
0,1081 svi harte ir mich chollet .
0,1082 Ir sult pringen .
0,1083 deme herren ze minnen .
0,1084 des hi wirt genuoge .
0,1085 waz ube ime daz ist seltsane
0,1086 wiroh unde honec .
0,1087 ioh wurze ioh unserez obez .
0,1088 nement zviualtin scaz
0,1089 so getruwet man eu deste baz .
0,1090 ub ir den widere pringet .
0,1091 den ir dannen uuortet .
0,1092 so ne zihet man evh
0,1093 untriwe . noh irretuomes .
0,1094 Benyamin den weisen .

0,1095 pevilhe ich z evren genaden .
0,1096 got ruche den herren .
0,1097 mit genaden zu ev cheren
0,1098 daz er mir laze wider haim .
0,1099 symeon ioh disen beniamin .
0,1100 Nu uat ir eweren sint .
0,1101 nu pin ich ane kint .
0,1102 nu sol ich mich lutzel gefrowen .
0,1103 e ich evh muz ane beshowen .”
0,1104 Weinente er chuste .
0,1105 benyamin ioh sine brudir .
0,1106 er beualch si gote .
0,1107 mit innereme gebete .
0,1108 Benyamin si dinoten .
0,1109 mit zarte si m uurten .
0,1110 in egyptum si chomen .
0,1111 uuor ioseben gestunten .
0,1112 Als er si unde benyamin gesach .
0,1113 sineme ambetmanne er zu sprah .
0,1114 “Leite dise in den sal .
0,1115 und beuach mir di kemenaten al .
0,1116 unde were got .
0,1117 gib uns genuoc
0,1118 ich wil ze mitteme tage .
0,1119 mit in wirtschafft haben .”
0,1120 Do er si in daz huos prahte .
0,1121 ze einander si sprachen .
0,1122 “durh den scaz .
0,1123 der unseres unwizzens in den secchen lach .
0,1124 so wane ich man uns armen .
0,1125 hi in not wil tun .”
0,1126 Si baten den kamerare .
0,1127 daz er in uirname .
0,1128 er fernam in do .
0,1129 si sprachen ime zuo .
0,1130 “Do wir nahest hi chovften .
0,1131 unde heim uuoren .
0,1132 unde sahen z unseren secchen .
0,1133 do uunden wir unseren scaz likken .
0,1134 daz sol got wizen .
0,1135 wannen er chome daz wir z ne wizen .
0,1136 den habe wir so widere braht .
0,1137 daz sin niene bristet .
0,1138 unsern chornchovf .
0,1139 habe wir braht ouh .”
0,1140 Er antwurte in .
0,1141 uile minnecliche .
0,1142 “ir ne durfet ev niht uurhten .

0,1143 fride si ev geheizen .
0,1144 Ir sult pilliche haben .
0,1145 daz ev got ruohte geben .
0,1146 daz ir mir scazzes gabet .
0,1147 niht ir mir des namet .
0,1148 den han ich gehalten .
0,1149 got muoze ewer walten .”
0,1150 Ir laite daz uz z in .
0,1151 ir brudir symeon .
0,1152 mit frowden si sich chuosten .
0,1153 daz si in lebentigen unde gesunt wessen .
0,1154 Ir fuzze si dwngen .
0,1155 fuoter den eselen truogen .
0,1156 Si hizen uz legen .
0,1157 da si deme herren mit wolten geben .
0,1158 Do iosep zu deme huose chom .
0,1159 ir gebe si ime gaben .
0,1160 si buten sich suze .
0,1161 ze sinen fuozen .
0,1162 genadecliche sprah er zuz in .
0,1163 er hiz si willechomen sin .
0,1164 Da nach er si fragete .
0,1165 ob ir uater lebete .
0,1166 ob er gesunt ware .
0,1167 oder wi er mahte .
0,1168 Si sprachen er lebete .
0,1169 unde sich wol gehabete .
0,1170 “er ist wol gesunt .
0,1171 unde hat dir gesenden sin trut kint .
0,1172 unseren minnisten bruodir .
0,1173 den er gewan in sineme alter .”
0,1174 Also iosep benyamin gesah .
0,1175 ich weiz er ime zuo sprah .
0,1176 “Nu saget mir ze ware .
0,1177 ist dizze ewer minnister bruder .
0,1178 nu muze dir got genaden .”
0,1179 er livf uon in in allen gahen .
0,1180 der amer begunde in ane gen .
0,1181 er ne mohte da niht gesten .
0,1182 di zahere in ane runnen .
0,1183 do begunde er uon in ilen .
0,1184 er livf in di kemenaten .
0,1185 unz er genuc geweinote .
0,1186 Daz antlutze er dvuoc .
0,1187 unde uestenote sinen muot .
0,1188 hine widere er ginc .
0,1189 zu deme muse er uinc .
0,1190 Dr sazze sunder .

0,1191 sunder sine bruodir .
0,1192 z einer anderen wente .
0,1193 sazen . di lantlute .
0,1194 wande z widerzame duhte .
0,1195 azzen di iuden . mit den heidenisken liuten .
0,1196 Nah ir alter si sazen .
0,1197 sunderbare si azen .
0,1198 der altiste . an deme sedele der heriste .
0,1199 der minniste . z Allernidereste .
0,1200 Di tailten daz prot .
0,1201 daz meiste wart deme nideristen .
0,1202 benyamin wart uinfteile mere .
0,1203 denne den anderen herren .
0,1204 si azen unde trunchen .
0,1205 unze si mahten screkken .
0,1206 Der uil gute iosep .
0,1207 sineme ambetmanne er gebot . er
0,1208 fulte des weizes di secche .
0,1209 so dir meiste in mohte .
0,1210 unde legete ir igeliches scaz .
0,1211 widere in sinen scach .
0,1212 unde sinen silberinen chopf purge .
0,1213 in des iungistin chorne .
0,1214 unde ime doh sinen scaz .
0,1215 legete uorn in sinen sach .
0,1216 Also do chom der tach .
0,1217 daz urlop man in gab .
0,1218 fro si dannen uuoren .
0,1219 unde wol uerre dannen chomen .
0,1220 iosep hiz den ambetman .
0,1221 in nah riten .
0,1222 Also se er irreit .
0,1223 er sprah in manec leit .
0,1224 Ia ir helede .
0,1225 wi getatet ir i so ubele .
0,1226 daz ir mineme herren so hat gelonet .
0,1227 daz ir ime sinen chof stalet .
0,1228 da er uz spulcte trincchen .
0,1229 ioh inne wonete lizen .
0,1230 ir habet ubele getan .
0,1231 ez sol ev svare irgan .
0,1232 Uil harte si irchomen .
0,1233 si sprachen daz si s unsculdic waren .
0,1234 “Den scaz den wir uunden .
0,1235 do wir unser secche imbunden .
0,1236 den brahte wir widere .
0,1237 ze mines herren kamere .
0,1238 du sprache hetest den dinen .

0,1239 unde hize in uns gehalten .
0,1240 ob uns got hete iht gegeben .
0,1241 du ne woltest sin niht phlegen .
0,1242 Wi mohte wir imer so getuon .
0,1243 daz wir da widere buten solchev lon .
0,1244 in sves sacche .
0,1245 der selbe chof stecche .
0,1246 den slah oder hach .
0,1247 wir sin dine scalche dar nah .”
0,1248 “Des ne wil ich niht tuon .
0,1249 den sculdigen wil ich ze scalche haben
0,1250 den wil ich chollen .
0,1251 di anderen uarn dar si wellen .”
0,1252 Do man di secche inpant .
0,1253 in des iungistes sacche man in uant .
0,1254 Er uinc in bi der hant .
0,1255 idoh er in nine bant .
0,1256 er chot uon rehten sculden sin .
0,1257 sines herren scalch muose er sin .
0,1258 Alle si ir gewant zarten .
0,1259 uil parcmliche harten .
0,1260 “so we uns wenigen .
0,1261 daz uz chom benyamin .
0,1262 wane ware wir alle irslagen .
0,1263 unde muose dich din uater haben .”
0,1264 Daz kint stunt weinente .
0,1265 want uor leide di hende .
0,1266 iz wante nimer mere .
0,1267 sinen bruder gesahen .
0,1268 Si uazzoten di esele .
0,1269 unde cherten hine widere .
0,1270 mit riweclichen . gebaren .
0,1271 si wanten daz baz kint uirlorn ware .
0,1272 Do ginc iudas .
0,1273 da iosep was .
0,1274 di andere alle nah ime .
0,1275 ir rede befulhhen si ime .
0,1276 Si gingen iosebe ze uuzen .
0,1277 paten sich ze rede lazen .
0,1278 iosep sprah do .
0,1278a uil ureisliche .
0,1279 “War dahtet ir .
0,1279a daz ir iht stalet mir .
0,1280 ia ne mac mir niman niht uirstelen .
0,1281 daz ez mege sin uirholen .
0,1282 mir n ist nimen lizzenes gelich .
0,1283 uur war des phligen ich mich .”
0,1284 Iudas sprah do .

0,1285 mit riwegeme muote .
0,1286 “waz mage wir da widere .
0,1287 uns ist geschehen uil ubele .
0,1288 wir pirn durh scante .
0,1289 chomen in dise scante .
0,1290 nu pir wir alle din .
0,1291 da ne muge wir zu gesprechen .
0,1292 sam wole wir .
0,1293 same der den chopf stal dir .”
0,1294 Do chot iosep .
0,1295 “des ne tun ich niht .
0,1296 der mir den chopf nam .
0,1297 den wil ich hi behaben .
0,1298 uart ir ungescante .
0,1299 heim z ewwerme lande .
0,1300 saget everm uater .
0,1301 wi hat getan . ever bruodir .”
0,1302 Iudaz dar naher trat .
0,1303 uil demutlichen er in bat
0,1304 daz er durh sine genade .
0,1305 ime ein lutz el uirname .
0,1306 Er gestatte ime des .
0,1307 waz tver nam in des .
0,1308 Do sprah iudas .
0,1309 truriges muotes .
0,1310 du geruhtest uns ze fragen .
0,1311 obe wir uater heten .
0,1312 oder obe wir heten mere .
0,1313 da heime deheinen bruder .
0,1314 Wir sprachen wir heten einen alten uater .
0,1315 unde einen wenigen brudir .
0,1316 den er in sineme alter gewan .
0,1317 sin bruodir ne wizze wir ware chom .
0,1318 Der ist sineme uater uil lip .
0,1319 er ne lat in uon ime niht .
0,1320 Do hize du dir in bringen .
0,1321 ze genaden ioh ze minnen .
0,1322 do sagete . wir dir herre .
0,1323 wi lip er ime ware .
0,1324 er het in uur di muoter .
0,1325 ioh uur den bruder .
0,1326 er ist ime so zart .
0,1327 daz er in ne lize necheine uart .
0,1328 Du sprache wir ne dorften mere here chomen
0,1329 wir ne wolten in mit uns nemen .
0,1330 Dizze wir allez zalten .
0,1331 unserme uater deme alten .
0,1332 er tet clage genuoge .

0,1333 daz wir des kindes i gewugen .
 0,1334 Da nah hiz er uns uaren .
 0,1335 nach der lipnare .
 0,1336 Wir sprachen ne getorsten .
 0,1337 mere daz lant suoehen .
 0,1338 noh chomen under din ovgen .
 0,1339 uberluot noh tovgen
 0,1340 mit uns ne uure daz kint .
 0,1341 leider ubele sint nu chomen sinev dinc .
 0,1342 Unser uater begunde truoeeren .
 0,1343 do gingen ime zu sine riwe .
 0,1344 unde sprah .
 0,1345 uil chume uber maht .
 0,1346 “ev ist wole chunt .
 0,1347 daz min wip mir gewan zvei kint .
 0,1348 den einen ich uz sante .
 0,1349 nimer er ne widere wante .
 0,1350 ir sprachet daz in ein tir fraze .
 0,1351 sinen roch an deme uelde lize .
 0,1352 ich ne gesah in nimer mere .
 0,1353 daz irparme dir got herre .
 0,1354 nemet ir mir ovh disen .
 0,1355 unde geshihet ime iht under wegen .
 0,1356 so ne lustet mere mich ze lebene .
 0,1357 so muz ich clagente den lip geben
 0,1358 so muozen mine grauue .
 0,1359 weinente uarn z ungenaden .”
 0,1360 Io ich iu shirest ane sihe .
 0,1361 unde ime sin kint niht widere gebe .
 0,1362 so harte ist er an in uircholen .
 0,1363 e ich in denne sehe cholen .
 0,1364 michel liber ist mir .
 0,1365 daz ich imer dine dir .
 0,1366 unde si in ellende .
 0,1367 denn ich chome ze lande .
 0,1368 mir ware liber under der erden .
 0,1369 denn er in deme amer irsterbe .
 0,1370 Ich nam in in mine triwe .
 0,1371 des muoz ich sin in rivve .
 0,1372 durch unsere sunte .
 0,1373 pir wir worden ze scanten .
 0,1374 triwe ne mac ich geleisten .
 0,1375 di muz got ane mih eisen .
 0,1376 daz ich in uz
 0,1377 prahte . ze dirre note .
 0,1378 sin unde des uater muz ich rede geben .
 0,1379 so got gebutet uber min leben .
 0,1380 dir ne sente got daz ze mute .

0,1381 daz tuo z tust durh dine gute .
0,1382 daz du mich habest ze scalche
0,1383 z eine igelicheme tagewerche
0,1384 tu mir al daz du wellest .
0,1385 daz tu in hi nine quellest .
0,1386 laz in heim .
0,1387 ich pin iemer gerne din suein .
0,1388 nieht ist des ich mich scame .
0,1389 ob tu genadic pist ime .
0,1390 wil du in lazen ze lante .
0,1391 ich lide imer dize ellende .
0,1392 Do ne mohte iosep . sich
0,1393 langer inthaben niht .
0,1394 er hiz ime intwichen .
0,1395 di da uore ime stunden .
0,1396 daz niman da ne ware .
0,1397 der sahe sin ungebare .
0,1398 so si einander irchanten .
0,1399 wi si sich danne manten .
0,1400 Josep wovfte unde weinote .
0,1401 mit riwegine muote .
0,1402 de iz alle di horten .
0,1403 di da uore stuonten .
0,1404 er sprah zuo sinen bruderen .
0,1405 uil minneclichen .
0,1406 “Nu ne furhtet ev niht .
0,1407 ich pin iz iosep .
0,1408 nu saget mir rehte .
0,1409 mines uater mahte .
0,1410 ob er lebe .
0,1411 odir wilch si sin gehabe .”
0,1412 Si irchomen uil harte .
0,1413 daz si ne gewilten ir worte .
0,1414 Josep hiz si naher gen .
0,1415 er wolte si mit genaden besten .
0,1416 Er chot iz iosep ware .
0,1417 rachele sun der altere .
0,1418 “deme ir den roch abe strovftet .
0,1419 unde in egyptelant uirchovftet .
0,1420 nu ne furhtet ev niht .
0,1421 noh ne missehabet evh niht .
0,1422 wande iz wolte got .
0,1423 daz ir ne laget tot .
0,1424 Des sint nu zvein iar .
0,1425 daz ane gi dirre hunger .
0,1426 noh ist er finf iar .
0,1427 daz ist alzoges war .
0,1428 so nimen ert noh ne sat .

0,1429 noh niman in snidet .
0,1430 durh daz hat got des gedaht .
0,1431 daz er mich here fure gesendet hat .
0,1432 daz ir werdet behalten .
0,1433 unde daz chorn hi muget chovfen .
0,1434 Ez was ever wille .
0,1435 unde was auer gotes wille .
0,1436 der daz fuocte .
0,1437 daz mich der chunic ze uater bate .
0,1438 und al dizze lant .
0,1439 gabe in mine hant .
0,1440 Nu ilet .
0,1441 neheine wile irtvalet .
0,1442 ir sult mineme uater sagen .
0,1443 daz er niht in darf clagen .
0,1444 daz ich noh lebe .
0,1445 pringet ime ovh mine gebe . unde
0,1446 saget ime daz mich got hat getan .
0,1447 alles disses landes herren .
0,1448 Saget ime daz er mir chome .
0,1449 mit aller siner gehebe .
0,1450 heize sinev hiwen .
0,1451 sin uihe mit ime triben .
0,1452 daz er unde sinev chindahe .
0,1453 deme hunger inphlihen .
0,1454 noh ime daz uihe firlorn werde .
0,1455 in der unbarigen erden .
0,1456 daz er der finf iare noh .
0,1457 dei nu zu gent .
0,1458 uberwinden mege .
0,1459 er unde alle di er habe .
0,1460 Saget ime alle min ere .
0,1461 daz er ne weine ni mere .
0,1462 saget im daz ich noch lebe .
0,1463 pit in daz er sich wole gehabe .
0,1464 er scule alles leides uirgezzen .
0,1465 des er sich nu lange hat frezzen .”
0,1466 Do er daz uolleredete .
0,1467 benyamin er zu ime habete .
0,1468 an den hals er ime vil .
0,1469 manegen zaher er ob ime li .
0,1470 einander si chuosten
0,1471 si uingen sich zesamene . mit den brusten .
0,1472 Iosep der luoste .
0,1473 albesunder er si chuoste .
0,1474 er ne li da neheinen under .
0,1475 er ne beweinote n unde chuoste n besundere .
0,1476 Do ne forhten si in mere .

0,1477 do wurden si uile here .
0,1478 schire uber al iz fuor .
0,1479 daz chomen waren iosebes bruoder .
0,1480 Do iosep hin ze houe gi .
0,1481 der chunic si uil wol inphinc .
0,1482 er wart uile fro .
0,1483 soleher heledede .
0,1484 si waren guote chnehte .
0,1485 si waren guter slahte .
0,1486 Vile wole er si handelote .
0,1487 er regazte si aller note .
0,1488 Ioseben er bat ioh gebot .
0,1489 daz muos er tun durh not .
0,1490 er hize sine brudere faren .
0,1491 halen ir uater ioh ir barn .
0,1492 daz ime ovh chome .
0,1493 svaz des chunnes ware .
0,1494 er wolte in des landes geben .
0,1495 daz si imer mit eren mahten leben .
0,1496 Er hiz in geben wagene .
0,1497 mit gute geladene .
0,1498 da man uf furhte wib unde kint .
0,1499 ioh anderen gesint .
0,1500 daz hinder in niwet bestuonte .
0,1501 deheiner ir gewante .
0,1502 si ne furten iz insamt .
0,1503 in egyptelant .
0,1504 Iosep was in uil lib . daz er im ez gebot .
0,1505 unde ne ware des gebotes pornot .
0,1506 er frumete doh . gerne ir gefure .
0,1507 er tet iz auer sus dester gernere .
0,1508 daz was in michel ere .
0,1509 daz si so zuo ime ladete sin herre .
0,1510 Sineme bruder er gebete .
0,1511 mit sabener wate .
0,1512 igelicheme zvei badegewant .
0,1513 so man si bestiv da uant .
0,1514 Benyamin gab er finfiv .
0,1515 ioh drev hundert phenninge .
0,1516 silberin si waren .
0,1517 ich ne weiz waz si wagen .
0,1518 iz ne duhte mich porrogroz .
0,1519 gebete mir da mite ein min genoz .
0,1520 Sineme uater er sante .
0,1521 sam vile scazzes unde also uil gewantes .
0,1522 Vfzehen esele er luot .
0,1523 uil maneger slahte guot .
0,1524 des egyptischen richtuomes .

0,1525 hine heim ze rome .
0,1526 sam manegen fazzote er mit wiste .
0,1527 ze der heimueste uriste .
0,1528 Do erlovpte er in .
0,1529 unde hiz si uaren mit minnen .
0,1530 daz si niene piegen .
0,1531 e si heim chomen .
0,1532 Frolichen si uuoren .
0,1533 unde heten benyamin sam ir herren .
0,1534 michele wunne .
0,1535 si heim prahten .
0,1536 mit micheler mandunge .
0,1537 fure ir uater si gingen
0,1538 Ir einer sprach do .
0,1539 ime vil froliche zuo .
0,1540 “Herre uater guote .
0,1541 wis mit guteme . muote .
0,1542 dir inbot din sun iosep .
0,1543 er ne ware noh niht tot .
0,1544 er ist uber al egyptelant .
0,1545 ein uizetum unde hat gewalt
0,1546 gewaltlichen er phleget .
0,1547 alles des der chunic hebet .”
0,1548 Also iacob daz gehorte .
0,1549 ime was als er eines trovmes irwachote .
0,1550 er ne gelovpte es niht .
0,1551 doh was ez ime uil lib .
0,1552 Von erist si ime sageten .
0,1553 daz si s niht uberheueten .
0,1554 wi si in bestrovften .
0,1555 ze den chaltsmiden uirchovften .
0,1556 wi ime got uirlech .
0,1557 daz er in egypte uurdech .
0,1558 daz er trut wart des chuneges .
0,1559 meister alles sines gedigenes .
0,1560 wi ime uber churz unde uber lanc .
0,1561 undertan ware daz lant .
0,1562 unde in der chunic pate .
0,1563 er chome ime mit allev dev er hate .
0,1564 mit wiben ioh mit kinden .
0,1565 mit allen ir dingen .
0,1566 er wolte si in mineme riche .
0,1567 bestiften richlichen .
0,1568 Do iacob di wagene gesach .
0,1569 unde al daz ime sin sun gab .
0,1570 do begund er wider leben .
0,1571 er was uil nach bechliben .
0,1572 nach sinen kinden weinende .

0,1573 allezane amerente .
0,1574 “Nu ne pite ich is paz .
0,1575 nu ich han gelebet daz
0,1576 daz min sun iosep .
0,1577 nu n ist niht tot .
0,1578 nu wil ich dare uarn .
0,1579 sehen minen liben barn .
0,1580 unde wil uil fro sin .
0,1581 nu ich in weiz lebentigen .”
0,1582 Iacob fazzote .
0,1583 al daz er hete .
0,1584 uf ros ioh esele .
0,1585 kint unde wip uf di wagene .
0,1586 daz uihe hiz er mite triben .
0,1587 er ne li niht heime beliben .
0,1588 sine sune mit ir chonen .
0,1589 ioh mit allen ir geheben .
0,1590 furen in egyptum .
0,1591 da besazen si michelen richtuom .
0,1592 Do iacob under wegen chom .
0,1593 des nahtes ime got haren began .
0,1594 Er chot “hi pin ich .
0,1595 wer wil mich .”
0,1596 “Nu gelovbe mir iacob .
0,1597 ich pin dines uater got .
0,1598 nine furhte dir .
0,1599 ich uar in egyptum mit dir .
0,1600 ich mache dine afterchunft .
0,1601 da uil witene kunt .
0,1602 mit dir uar ich dare .
0,1603 unde wider pringe ich dich here .
0,1604 Iosep ob dir gestet .
0,1605 so dir di sele uz get .
0,1606 din ovgen er luchet .
0,1607 so er din ni mere bruochet .
0,1608 wider heim er dich fuoret .
0,1609 mit der erde er dich bedechet .
0,1610 da du dir selben leger grube .
0,1611 da du dich heimen hube .”
0,1612 Iacob unde di mit ime uuoren .
0,1613 aller samt ir sibenzec waren .
0,1614 si fuorten in egyptelant .
0,1615 mit in uihe unde gewant .
0,1616 Jacob uure sante .
0,1617 daz man iosebe chunte .
0,1618 daz er unde ellev sinev fruont .
0,1619 waren chomen in daz lant .
0,1620 er pat daz er in gesahe .

0,1621 in deme guv iesse .
0,1622 Iosep sa dar reit .
0,1623 mit ime manec riter gemeit .
0,1624 Sinen uater er ane lif .
0,1625 er was ime uil lip .
0,1626 an den hals er ime uil .
0,1627 manegen zaher er ob ime li .
0,1628 er chuste in dicche .
0,1629 unde sufzote ob ime ofte .
0,1630 Do sprah iacob .
0,1631 zu deme guten iosep .
0,1632 “Nu ich dich gesehen han .
0,1633 nu wil ich froliche sterben .
0,1634 nu ich dich laze hinder min .
0,1635 des lobe ich dich trehtin .”
0,1636 Do sprah iosep .
0,1637 zu sinen uater iacob .
0,1638 “ir scult biten .
0,1639 ich wil ze deme chunege riten .
0,1640 ich wil ime zellen .
0,1641 allen dinen willen .
0,1642 du sist chomen ze sinen genaden .
0,1643 mit kinden ioh mit wiben .
0,1644 wi man al din uihe .
0,1645 here mit dir tribe .
0,1646 daz niht diner gewante .
0,1647 da heime si bestanten .
0,1648 Svenne er evh fordere .
0,1649 unde evh frage .
0,1650 waz ir chunnet dinen .
0,1651 oder waz ir spulget tun .
0,1652 so sprechet daz ir anders werches .
0,1653 ne phleget . wan iur chorters
0,1654 ir sit uon kintheit gewenet .
0,1655 mit uihe gen .
0,1656 swer wole chunne den list .
0,1657 daz er under ev si der tuorist .
0,1658 Daz chodet uon dev .
0,1659 daz si ne men evh .
0,1660 daz ir mit genaden .
0,1661 in disme gowve meget puwen .
0,1662 wande in widerzame sint .
0,1663 di des uihes huotent .
0,1664 si sehent si ungerne .
0,1665 danne sceident si evh uon in uerre .
0,1666 daz ir evh hi meget begen .
0,1667 daz si s e niht uirsten .
0,1668 Hi ist daz lant allerbeste .

0,1669 daz wil ich daz ir besizet .
0,1670 ir scult eweres uihes hutē .
0,1671 also ewer fōderē taten .
0,1672 daz ne was ev heime . nehein scande .
0,1673 svi so es dunche scande in disme lande .”
0,1674 Iosep deme chunege sagete .
0,1675 welehen gezevc sin uater habete .
0,1676 er ware in deme gowve .
0,1677 mit alleme sineme gesinde .
0,1678 er wolte da biten .
0,1679 waz der chunich uber in wolte gebieten .
0,1680 Er hiz in ime chomen .
0,1681 er wolte in gesehen ioh uirnehmen .
0,1682 er ware ime uil lip .
0,1683 durh sinen sun iosep .
0,1684 zestete er in besante .
0,1685 einer nach ime rante .
0,1686 si baten daz er chome .
0,1687 deme chunege uil shire .
0,1688 Iacob ioh sine sune .
0,1689 uil drate chomen si ime .
0,1690 der selbe alticche .
0,1691 was ein wolgetan recche .
0,1692 er hiz di sune mit ime gen .
0,1693 unde uur den chunic sten .
0,1694 iwederhalb sin stunten .
0,1695 di herren uil shone .
0,1696 si waren alle erlich .
0,1697 in ne was da nimen gelich .
0,1698 also si ime got hete irchorn .
0,1699 der wolte uon in werden geborn .
0,1700 Der chunic hiz in sin willechomen .
0,1701 same tet er di sin sune .
0,1702 er fragete waz si chunden werchen .
0,1703 oder wi si im wolten dinen .
0,1704 durh ir watliche .
0,1705 wolt er . in geben ambahte richēv .
0,1706 si sprachen daz si nihtes spuclden .
0,1707 niwar ir uihes halten .
0,1708 si sprachen daz si gerne ze site heten .
0,1709 daz ir uorderen taten .
0,1710 si baten daz si musen besten .
0,1711 in der marche ze iesse .
0,1712 Der chunic so gewerte .
0,1713 des ir uater gerte .
0,1714 da daz lant beste bare .
0,1715 daz ez ir ware .
0,1716 “daz ev allerbeste liche .

0,1717 da besizet dev riche .”
0,1718 Iacob in duhte in sinen gebaren .
0,1719 den chunic ein geistlich man .
0,1720 do fraget er in uon sinem altere .
0,1721 wi uile siner iare ware .
0,1722 Er chot daz er niht alter ne ware .
0,1723 ne wane zehenzic unde drizec iare .
0,1724 er chot di so gelebet ne hete .
0,1725 in decheiner slahte guote .
0,1726 daz er so alt wurde .
0,1727 so er scolte uon geburte .
0,1728 Do si do uolredeten .
0,1729 des si beide gezam
0,1730 iacob genadote deme chunige .
0,1731 unde beualch in gote . mit sineme segene
0,1732 unde nam urlap .
0,1733 gi zu sineme sune iosep .
0,1734 der gab ime al des genuc .
0,1735 des div erde par oder truoc .
0,1736 Da daz lant bezzeste was .
0,1737 iacob mit sinen sunen ez besaz .
0,1738 Von tage ze tage .
0,1739 merote sich des hungers clage .
0,1740 svaz daz livt scazzes hete .
0,1741 den prahte ez ze iosebe .
0,1742 umbe daz chorn si in gaben .
0,1743 uerre ioh nahen .
0,1744 uber al daz riche .
0,1745 des wart des chuneges chamere . uil riche .
0,1746 Do si ne mere scazzes heten .
0,1747 ir uihe si prahten .
0,1748 rinder unde scap .
0,1749 ese . unde ros da nah .
0,1750 daz iar er dar umbe .
0,1751 furte si uile chume .
0,1752 Do daz iar hine chom .
0,1753 iosebe si zu sprachen .
0,1754 er lize in irbarmen .
0,1755 daz si uil armen .
0,1756 ne heten uihe noh scap .
0,1757 er hulfe in ettewaz .
0,1758 in ne ware niht bestanden .
0,1759 in scappe noh gewande .
0,1760 si ne heten niht mere .
0,1761 niwan des libes unde der erde .
0,1762 er name di z ame .
0,1763 unde chert ez in des chuniges frume
0,1764 si wurden selbe sine scapche .

0,1765 gaben di aigen zu siner gewalt
0,1766 ob er si generte .
0,1767 unde di erde mitsamt ime bewarte .
0,1768 waz daz guot ware .
0,1769 ob div erde wurde unbare .
0,1770 unde lage wuste .
0,1771 ze neheineme troste .
0,1772 er li si selben fri besten .
0,1773 er ne wolte ir niht . ze scalke tun .
0,1774 Diz duhte in sunde .
0,1775 di er fri funde .
0,1776 ob er di ze scalken tate .
0,1777 durch dehein ir note .
0,1778 er wolte si gewielten ire .
0,1779 so der hunger wurde fure .
0,1780 daz si denne frilichen .
0,1781 mohten ir dinc werfen .
0,1782 daz ir igelich genuc gewunne .
0,1783 ob in nimen in dvunge .
0,1784 Sver ime bot daz eigen .
0,1785 des ne wolte er niht weigeren .
0,1786 er chovfte in des chuneges gewalt .
0,1787 di ere manecfalt .
0,1788 uon des landes ende .
0,1789 chovfte er z allez ze des chuniges hende .
0,1790 Dei di phaffen
0,1791 inder ane wunden .
0,1792 di in gelazen waren .
0,1793 uon des chunges genaden .
0,1794 di ne wolt er chovfen .
0,1795 den hiz er sus heluen .
0,1796 mit nare ioh mit samem .
0,1797 daz si di not uberchomen .
0,1798 Ioseph sprah do .
0,1799 zu deme livte .
0,1800 “nu al ewer guot .
0,1801 in des chuneges gewalt stet .
0,1802 nu nemet samem .
0,1803 daz div erde mege wucheren .
0,1804 Svas so chornes werde ev .
0,1805 daz teilet in uinfiv .
0,1806 daz uinfte sult ir geben .
0,1807 ze des chuniges hou .
0,1808 mit den uiren .
0,1809 sult ir evh unde ewer kint furen .
0,1810 ioh ewer hiwen .
0,1811 daz si niht becliben .”
0,1812 Gut duhte si daz gedinge .

0,1813 si antwurten ime in mandunge .
0,1814 “Wir sehen daz al unser genist .
0,1815 in diner hant ist .
0,1816 nu ruche du uns ane schowen .
0,1817 wir dinen deme chunige mit frovden .”
0,1818 After dev waren . si gewis .
0,1819 alles ir lebenes .
0,1820 ioseph si so prahte .
0,1821 uz der hungeriare note .
0,1822 Uon dev unze in ewic .
0,1823 so ist der zins fertic .
0,1824 daz manneclich . ane weigern .
0,1825 gibet ab sineme eigen .
0,1826 daz uinfte teil siner chorne .
0,1827 ze des chuneges urbore .
0,1828 di sint ovh vz genomen .
0,1829 di in phaffeheite leben
0,1830 so stunt ez bi den heiden .
0,1831 ich ne weiz ob ez noh di cristen meinen .
0,1832 Jacob unde sin chunne
0,1833 was da in micheler wunne .
0,1834 got in irgazte suoze
0,1835 uil maneger gruoze .
0,1836 er hete sailde unde fransmuot .
0,1837 aller eren genuc .
0,1838 er ne mohte selbe wizzen .
0,1839 wilehen richtuom er hete besezzen .
0,1840 Do lebete er dare .
0,1841 daz frist sibenzec iare .
0,1842 Do iacob uirstunt
0,1843 daz ime nahote der tot .
0,1844 do hiz er ime gewinnen .
0,1845 ioseben sinen liben sun .
0,1846 Uil shire er ime chom .
0,1847 do begund er in bitten .
0,1848 daz er ime gutes getate .
0,1849 daz er daz an dev gestate .
0,1850 so er irsturbe .
0,1851 daz er in in egypto da nine beuulhe .
0,1852 daz er n vz deme ellende .
0,1853 furte heim ze lande .
0,1854 unde in begrube .
0,1855 da sin uater unde sin ane lage .
0,1856 Uon ime er in nine liz .
0,1857 e er im z uaste gehiz .
0,1858 noh ne mohte sich des irwerigen .
0,1859 er ne muse ime des sverigen .
0,1860 Do iosep gesach .

0,1861 sines uater unmaht .
 0,1862 do nam er zu ime .
 0,1863 sine zuene sune .
 0,1864 zu sineme uater er gi .
 0,1865 uile wole er in imphi .
 0,1866 an daz pette er gesaz .
 0,1867 zu iosebe er sprah .
 0,1868 “Do ich pegab min heim .
 0,1869 der almahtige got mir irshein .
 0,1870 mich selben er wihte .
 0,1871 unde alle di chomen uon mineme libe .
 0,1872 uon div so wil ich .
 0,1873 daz dine sune erlich .
 0,1874 manasses unde effraym .
 0,1875 sin sune mine
 0,1876 di du noh gewinnest .
 0,1877 der du dich underwindest .”
 0,1878 Do er div kint gesach .
 0,1879 zu iosebe er sprah .
 0,1880 “Wer sint dise .”
 0,1881 iosep chot iz waren sine sune .
 0,1882 “nu leite mir here si .
 0,1883 daz ich si gewihe .”
 0,1884 daz gesune ime tunchelote .
 0,1885 daz tet ez durh note .
 0,1886 er was ein alt man .
 0,1887 er ne mohte niht heitere gesehen .
 0,1888 Ioseph laite ime si dare .
 0,1889 er begreif si uil gare .
 0,1890 er halste si iovh chuste .
 0,1891 dei kint also luste .
 0,1892 er handelote si zarte .
 0,1893 er frovte sich ir harte .
 0,1894 Ioseph dei chint stalte .
 0,1895 zuo sinen uatero beidenthalbe .
 0,1896 manasses ze der zesewen .
 0,1897 effraym ze der winsteren .
 0,1898 Iacob di hende .
 0,1899 uber einander scancte .
 0,1900 di zesewen uber effraym .
 0,1901 di winsteren uber manasse .
 0,1902 Do ioseph daz gesach .
 0,1903 do was ez ime ungemach .
 0,1904 er wolte ime di zesewen
 0,1905 haben uber manassen .
 0,1906 er chot de iz niht pillich ware .
 0,1907 manasse ware der altore .
 0,1908 Jacob chot wole wesse waz er wolte .

0,1909 unde was er tuon scolte .
0,1910 der altere wurde .
0,1911 uil mahtic siner geburte .
0,1912 daz auer der iungere .
0,1913 wurde der herore .
0,1914 er ne mahte des gotes willen .
0,1915 niht uirwandelen noh gestillen .
0,1916 Di hende li er ime ligen .
0,1917 er begunde ze gote digen .
0,1918 daz er durh willen siner forderen .
0,1919 in geruhte erhoren .
0,1920 der ime uone chintheite .
0,1921 hulfe uzer arbeite .
0,1922 daz der engel chome .
0,1923 der in ofte uzer angesten name .
0,1924 unde di kint gesegenote .
0,1925 ob den er sine hente hete .
0,1926 durh dinen heiligen namen .
0,1927 den ane ruofte min ene abraham .
0,1928 ioh min uater Isaac .
0,1929 so er ane sineme gebete lach .
0,1930 daz si muszen wahsen .
0,1931 mit saliger slahte .
0,1932 daz si rehte muzen getuon .
0,1933 dir trehtin gedinon .
0,1934 du geruche in ovh geben .
0,1935 daz solch werde ir leben .
0,1936 “swer deme anderen gutes bete .
0,1937 daz er ir gehukke .
0,1938 daz enes dinc so wole irge .
0,1939 sam effraym unde manasse .”
0,1940 Do stalt er effraym .
0,1941 fur den bruoder sin .
0,1942 do sprah er ze iosebe sineme sune .
0,1943 daz er stunte ob ime .
0,1944 “Ich ne mach niht langer leben .
0,1945 got geruoche mit ev wesen .
0,1946 unde geruche evh hinnen .
0,1947 widere ze ewerme erbe bringen .
0,1948 Uernim mir ioseph .
0,1949 mit dinen bruderen teile niht .
0,1950 daz ich deme chunege amorreo genam .
0,1951 mit pogen ioh mit wafenen”
0,1952 Da nach pat er alle sine sune .
0,1953 daz si chomen z ime .
0,1954 daz si uirnamen .
0,1955 wi ir lezzesten dinc irgingen .
0,1956 Do si wurden innen .

0,1957 daz sin ende nahen begunde .
 0,1958 daz pette si umbestuonten .
 0,1959 mit amarigin muoten
 0,1960 si sprachen daz si gerne da waren .
 0,1961 sinen segen uirnamen .
 0,1962 waz in got erteilt hete .
 0,1963 ze wiv er ir ruhte .
 0,1964 Do lach iacob .
 0,1965 dahte uerre ane got .
 0,1966 unde pat in uil genote .
 0,1967 daz er ime irzeigote .
 0,1968 welich rat wurde .
 0,1969 siner geburte .
 0,1970 ob iht under in ware .
 0,1971 des ime gezame .
 0,1972 an deme irginge .
 0,1973 des er gehize abrahame .
 0,1974 daz uon sineme samen .
 0,1975 noh der chome .
 0,1976 der di werlt alle .
 0,1977 irloste uon der helle .
 0,1978 Do er daz gebet .
 0,1979 uil inneclichen getet .
 0,1980 do hiz er sine sune .
 0,1981 daz si uirnamen ime .
 0,1982 Uil stille si svicten .
 0,1983 zu siner rede dahten .
 0,1984 Er chot “min sun Ruben .
 0,1985 uirnim wi z dir sol irgen .
 0,1986 Du bist dev sterche .
 0,1987 miner werche .
 0,1988 du bist min sun der eriste .
 0,1989 du soltest sin der heriste .
 0,1990 du ware daz erst ser .
 0,1991 min unde diner muoter .
 0,1992 warest du biderbe .
 0,1993 so soltest du haben uon erbe .
 0,1994 so wir z turistez heten .
 0,1995 du soltest dinen bruderen gebiten .
 0,1996 Daz alles du uirworhtest .
 0,1997 do du got ne uorhtest .
 0,1998 unde minen chebesen uberlage .
 0,1999 an mineme bette gesvase .
 0,2000 du tate deme wazzere gelich .
 0,2001 daz in deme uazze niht inthabet sich .
 0,2002 daz uz rinnet .
 0,2003 sva ez loch uindet .
 0,2004 also iltest du flizen

0,2005 dine gelust gebuzen .
0,2006 Got daz ne welle .
0,2007 daz in solcheme ualle .
0,2008 niht diner geburte .
0,2009 mere sulch werde .”
0,2010 Symeon unde leui .
0,2011 segenote er da bi .
0,2012 er chot si waren ein wichuaz .
0,2013 in in ware nit unde haz .
0,2014 Bat daz sin sele .
0,2015 nimer in ir rat chome .
0,2016 noh er ne wolte sich hail .
0,2017 ir crone haben teil .
0,2018 wanda si in ir heizmuote .
0,2019 erslugen livte guote .
0,2020 unde in ubeleme willen .
0,2021 taten eine burchmure ualzen .
0,2022 er chot ir stritmuot .
0,2023 solte sin uirfluchet .
0,2024 si ne gelovpten sich ir zorne .
0,2025 si waren di uirlornen .
0,2026 “Die under ev werden guot .
0,2027 di sin sune min in iacob .
0,2028 di ubelen ich zesprenge .
0,2029 ellev genade si in enge .”
0,2030 Er ne segenote si niht mere .
0,2031 er ne mohte uon sere .
0,2032 daz si mit untriwen .
0,2033 rachen ir riwe .
0,2034 “daz dina din svester .
0,2035 selbe hete irworfen laster .”
0,2036 unde si daz puzten .
0,2037 anders denne si scolten .
0,2038 “Iuda min kint .
0,2039 wole irgent dir dinev dinc .
0,2040 du wirst diner crefte .
0,2041 trost aller diner chunnescefte .
0,2042 dine brudere dich lobent .
0,2043 so si din reht uirstent
0,2044 du gewinnest uiande .
0,2045 di genicchet din mahtigev hant .
0,2046 du irwirst so groz ere .
0,2047 daz dich al din chunne heizet herre .
0,2048 uil mariv lant .
0,2049 choment in dine hant .
0,2050 so du div gewinnest .
0,2051 deme lewen du gelich gebarest .
0,2052 der under tiren nimet .

0,2053 al des in gezimet .
0,2054 den ellev tir furhtent .
0,2055 so er under siv chumet .
0,2056 du slehest unde rovbest .
0,2057 unze du alle dine uiande getovbest .
0,2058 Also den lewen iovh di lewinnen .
0,2059 niman getar gewechen .
0,2060 so er sich geleget ruwen
0,2061 mit offenen ovgen .
0,2062 sam ne geturren uiande din .
0,2063 niht dich gegruozen .
0,2064 So du bist fridelich .
0,2065 in dinen richen .
0,2066 so du list slauest .
0,2067 din ovgen wahchent .
0,2068 si uirbernt dich gare .
0,2069 du bist ir aller are .
0,2070 Vone iuda ne wirt niemer genomen
0,2071 daz kunincliche sceptrum .
0,2072 noh fon sinen . huffen .
0,2073 ne gebristet chunere herzogen .
0,2074 unze der geborn wirt .
0,2075 der alle di werlt genert .
0,2076 des chunfte alle di beiten .
0,2077 di uber alle di werlt sint gebretet .
0,2078 Der bintet der eselinnen sun .
0,2079 an sines wingarten zuon
0,2080 di muter an di winrebe .
0,2081 daz sin siner minnone gebe .
0,2082 daz er iuden noh heiden .
0,2083 ime ne lat inphreiden .
0,2084 er wil daz iwedere livt .
0,2085 werde sin truot .
0,2086 nimer er n irwindit .
0,2087 e er sich mit minnen zesamene gebindet .
0,2088 In deme wine er wasket .
0,2089 da er mite ist gerustet .
0,2090 di schone stole .
0,2091 daz ist ein gewate frone .
0,2092 ioh in des winpers pluote
0,2093 sine lachen er dunchet .
0,2094 Schonere denne der win .
0,2095 sint dev ovgen sin .
0,2096 siner zande gliz .
0,2097 ist wizer denne dev milch wiz .
0,2098 Dizze ist ein tifev rede .
0,2099 ich wane si imen irchennen mege .
0,2100 Chunde ich daz uirnemen .

0,2101 daz ich da uber han gelesen .
0,2102 gerne ich denne sagete .
0,2103 welche bezeichnunge ez habete .
0,2104 Iudaz quit pihtare .
0,2105 unde bezeichnenet dich herre .
0,2106 du dines uater iahe .
0,2107 unze du hi in werlte ware .
0,2108 du sprache in des woldest loben .
0,2109 daz er daz chinden hete gegeben .
0,2110 daz er wisen unde chargen
0,2111 hete uor geborgen .
0,2112 want dir dich einuoltlichen meinet .
0,2113 unte sich der suntene gireinit .
0,2114 der bezeichnenet daz chint .
0,2115 deme di genade geoffenet sint .
0,2116 Sver so auer sinen wistuom .
0,2117 cheret in werltlichen ruom .
0,2118 unde allen sinen sin .
0,2119 cheret in werltlichen gewin .
0,2120 noh dich ne furhtet .
0,2121 so er ubele wurchet .
0,2122 der muoz der ewigen wunne .
0,2123 in ener werlt mangelen .
0,2124 Got ne wil niht haben uirlorn .
0,2125 daz er durch uns wart geborn .
0,2126 wir sulen in loben .
0,2127 daz er uns ze brudern wil haben .
0,2128 Er hat uberwunten .
0,2129 al unser uiante .
0,2130 er hat si gedovbet .
0,2131 di helle hat er berovbet .
0,2132 Do dev gotheit .
0,2133 ane sich nam di menneskhait .
0,2134 do was der lichname .
0,2135 sin wat shone .
0,2136 unde er mit deme lachen .
0,2137 geruhte sine gotheit dechen .
0,2138 Do er di alten e .
0,2139 uil uollechen begi .
0,2140 daz er daz ne wolte miden .
0,2141 er ne lize sich besniden .
0,2142 unde sich mit opphere wolde reinen .
0,2143 swi er ne hete nehein meil .
0,2144 unde al daz tete
0,2145 daz under Juden was site .
0,2146 do het er in deme wine .
0,2147 gewasken wat sine .
0,2148 Do er do di toffe an sich nam

0,2149 unde manege not begunde liden .
 0,2150 unde li sinen lichnamen .
 0,2151 an deme cruce marteren .
 0,2152 do het er gedunket .
 0,2153 sin lachen in daz pluot .
 0,2154 Do er do zvene tage .
 0,2155 geruwete in deme grabe .
 0,2156 an deme dritten morgen .
 0,2157 mahte der tifel sorgen .
 0,2158 er stunt uone deme tode .
 0,2159 mit libe ioh mit sele .
 0,2160 er fur mit lewen chrefte .
 0,2161 die helle brechen .
 0,2162 den tifel er gebant .
 0,2163 er warf ime einen pogen in den munt .
 0,2164 daz deme selben gule .
 0,2165 alzane offen stunde daz mule .
 0,2166 so wir fon sunden .
 0,2167 chomen in den slunden .
 0,2168 daz der ubele hunt .
 0,2169 ne mege zu luchen den munt .
 0,2170 daz er durh pihte unde durh puoze .
 0,2171 sines undanches uns laze .
 0,2172 Cristes ovgen .
 0,2173 sint siner lere tovgen .
 0,2174 di den genade geheizent .
 0,2175 di ir missetat puzent .
 0,2176 di selben ovgen . sint
 0,2177 shoner denne der win .
 0,2178 der dir bezeichnenet di alten e .
 0,2179 div deme sculdigen tet uil we .
 0,2180 wand si mit gelicheme rach .
 0,2181 sver ir tet dechein . ungemach .
 0,2182 Die zende chliubent .
 0,2183 daz man in den munt schvbet .
 0,2184 si sulen besuchen .
 0,2185 wes der lip ruche .
 0,2186 der lip es niht in ruoret .
 0,2187 e si ez bewarent .
 0,2188 so si z uberwindent .
 0,2189 dev chele ez uirslindet .
 0,2190 same tuont di predigare .
 0,2191 an ir lere .
 0,2192 si geheizen deme livte .
 0,2193 daz si werden gotes truote
 0,2194 tunt si daz gote gerisi .
 0,2195 daz si chomen zi paradisi .
 0,2196 daz si ovh megen intrinnen .

0,2197 daz si ze helle nine prinnen .
0,2198 daz scol man garnen .
0,2199 mit guoten werchen .
0,2200 Sven si so gelerent .
0,2201 daz si in ze gote becherent .
0,2202 daz er wirt reine .
0,2203 ane suntone maile .
0,2204 so sint si wizzere denne dev milch .
0,2205 da man mite muset dev kint .
0,2206 di dannoh ne mugen ezzen .
0,2207 daz ueste ezzen .”
0,2208 Disev rede get ane iudam .
0,2209 iacobes sun gote werden .
0,2210 “Zabulon uirnim waz ich dir sage .
0,2211 du solt puwen an des meres stade .
0,2212 da di schef lenten .
0,2213 da ze sydone solt du irwinden .
0,2214 daz da ze dir genade uinden .
0,2215 di vz des meres freise intrinnen .
0,2216 unde sven der tifel iage .
0,2217 daz er zu dir fluoht habe .
0,2218 unde an deme ende .
0,2219 da ze hymele irlenten .
0,2220 Min sun ysachar .
0,2221 ich sage dir in al war .
0,2222 du bist ein starcher esil .
0,2223 du wirdest uil uesil .
0,2224 du flizzest dich wishait .
0,2225 fazzost dich der arbeit
0,2226 so du dich des gesattest .
0,2227 an der marche du ruowest .
0,2228 so dunchet dich dev reste .
0,2229 aller dinge bezzest
0,2230 so buwest du dir werde .
0,2231 di parigen erde .
0,2232 din ahselen du under sezzest .
0,2233 so du under der purde svizzest .
0,2234 du muost dinen zins geben .
0,2235 daz du mit genade muozzest leben .
0,2236 Dan sol gebiten .
0,2237 ovh sinen luoten .
0,2238 sam ander din chunne .
0,2239 mit luzzeler minne .
0,2240 wande der din charger sin .
0,2241 der ist gelich der nateren .
0,2242 dev uile stille shlichet .
0,2243 unze si etewen gebizzet .
0,2244 du bist ein gehurnter wurm .

0,2245 der an deme stige heuet sinen zorn .
0,2246 der daz ros an den huof stichet .
0,2247 der denne da uofe sizzet .
0,2248 daz der ualle .
0,2249 nider chome an dem nelle
0,2250 noh uf ne mac chomen .
0,2251 e er ime benimet daz leben .
0,2252 so ne mac er sich gerechen .
0,2253 so muoz er sprechen .
0,2254 herre got nu pitte ich .
0,2255 daz du irnerest mich .”
0,2256 Daz puch uns saget .
0,2257 welche bezeichnunge dize habet .
0,2258 Dev natere bezeichnenet di honchuost .
0,2259 der gehurnte wurm den antecrist .
0,2260 der wech disen lip .
0,2261 di werclichen note . der enge stich .
0,2262 daz ros ubermuote . hizzet
0,2263 herschaft der dar ufe sizzet .
0,2264 der gehahte huof .
0,2265 des entis wuof .
0,2266 Sver des beginnet .
0,2267 daz er dizze leben minnet .
0,2268 dem shichet der tifel zu .
0,2269 daz er me einen piz getuo .
0,2270 harte er in hekket .
0,2271 svenne er in uirleitet .
0,2272 so er nah eren strebit .
0,2273 unde sine dimuot begibet .
0,2274 unde di herschaft gewinnet
0,2275 da er nach prinnet .
0,2276 so er s denne minniste wanet .
0,2277 der tot ime nahet .
0,2278 sin ubermuot uellet .
0,2279 der tot in bechrellet .
0,2280 so n ist siner rede niht mere . newar
0,2281 “nere mich truot herre .”
0,2282 Der gehurnte wurm .
0,2283 daz ist des antechristes zorn .
0,2284 der geborn wirt uone dane .
0,2285 sos ich gesehen han .
0,2286 der dir ze iungest chuomit .
0,2287 so dev werlt ende nimet .
0,2288 des gewalt wirt so groz .
0,2289 daz er ne wil haben necheinen genoz .
0,2290 michel wirt sin ubermut .
0,2291 er wil wesen guot .
0,2292 di christenlichen gelovbe .

0,2293 hat er ze huohe .
0,2294 sumeliche er heizet uirbiten .
0,2295 sumeliche heizet er miten .
0,2296 daz niman geloube .
0,2297 uberluot noh tovgen .
0,2298 an der magede sun
0,2299 Sce- marien .
0,2300 So beginnet er zeichnen .
0,2301 er chut er si gotes sun .
0,2302 div menige ime gelovbet .
0,2303 mit gewalte er si dovbet .
0,2304 di ime denne geuolgent .
0,2305 got si irpalgent .
0,2306 di auer an der gelovbe gestent .
0,2307 uile wole der dinc irgent .
0,2308 di lident hi michele chole .
0,2309 in geniset auer di sele .
0,2310 Daz welle Christ gotes sun .
0,2311 daz wir z alle muzen tun .
0,2312 daz wir chomen ze genaden .
0,2313 des chodet alle aMeN .
0,2314 Dannen ist mere gescriben .
0,2315 daz wil ich uberheuen .
0,2316 der iz paz uuoge .
0,2317 der mac dannen sagen . genuoge .
0,2318 “Du min sun Gat .
0,2319 uil wole dir daz svert stat .
0,2320 gegurteter du uihtest .
0,2321 daz livt du beschirmest .
0,2322 uorne du dich werist .
0,2323 hinter dich slehest .
0,2324 wole du behaltest .
0,2325 al des tu waltest .”
0,2326 Du bezeichnenest ovh Crist .
0,2327 der unser uurvehete ist .
0,2328 der den tifel hat überwunden .
0,2329 unde in der helle gebunden .
0,2330 noh scol er chomen .
0,2331 uns ime alzoges benemen .
0,2332 wande an deme lezzesten tage .
0,2333 wane er sin dinc wil haben .
0,2334 so nimet er uns schone .
0,2335 ze paradyse frone .
0,2336 div helle sich induchet .
0,2337 den tifel si uirluchet .
0,2338 so werde wir gesherit .
0,2339 de z uile wole uert .
0,2340 “Min kint aser .

0,2341 dich uirbirt allez ser .
0,2342 faizet ist din prot .
0,2343 dich ne dvinget nehein not .”
0,2344 Do er ime gab protes genuoch .
0,2345 do het er alles dinges vberfluoz .
0,2346 daz nach deme prote sol gen .
0,2347 daz mege wir da bi uirsten .
0,2348 daz er chot den chunegen .
0,2349 ze flizze solte dinen .
0,2350 er bezeichnenet ovh unseren herren Crist .
0,2351 der hymeliskez prot ist .
0,2352 ane daz niman mac genesen .
0,2353 der sin schalch wil wesen .
0,2354 des heiligez wort .
0,2355 uns git ewigen trost .
0,2356 Di mit in selben uehtent .
0,2357 daz si sich unrehtes geloubent .
0,2358 daz sint chunegen
0,2359 an der sele edele .
0,2360 den dinet er ze flize .
0,2361 mit gaistilcheme inbize .
0,2362 Er gesizzet ime werde .
0,2363 mit in ze merde .
0,2364 in micheler gutliche .
0,2365 in deme himelriche .
0,2366 dar di nae chomen .
0,2367 di ze weriworte namen .
0,2368 der eine chot hete gechovfet .
0,2369 ein dorf uil gut .
0,2370 er muse daz peshovwen .
0,2371 der pat sich uirsprechen .
0,2372 der andere chot er ware nuolichen gehit .
0,2373 unde hete ime ein libez wip .
0,2374 der bat sich mit hulden .
0,2375 auer so insculden .
0,2376 Do was des dritten weriwort .
0,2377 er hete gechovfet .
0,2378 finf gewetene ohsen .
0,2379 er muse di besuchen .
0,2380 der selbe uirwazzene .
0,2381 bat sich auer des merdes irlazen .
0,2382 Do di poten gesageten .
0,2383 welihe antsegede si habeten .
0,2384 er ne hiz si niht irwinten .
0,2385 e si brahten alle di si funden .
0,2386 Si gingen an di strazen .
0,2387 da di armen sazen .
0,2388 daz huos si irfulten .

0,2389 der unseren gelichen
0,2390 da ene zu geladet waren .
0,2391 daz gescah uns ze genaden .
0,2392 Daz was aseris segen .
0,2393 des ne solte wir niht überheben .
0,2394 “Kint min neptalym .
0,2395 weme mac ich dich ebenmazen .
0,2396 also der hîrîz uerit .
0,2397 so er ûz lazen wirt .
0,2398 der dir ist uil gezal .
0,2399 über perc ioh tal .
0,2400 der tut hinnen unde ennen .
0,2401 manege sprunge .
0,2402 sam snelle du uirentest .
0,2403 al daz du an gest .
0,2404 niht dir intvisket .
0,2405 des dich geluostet .
0,2406 durch dine rede spahe .
0,2407 di tu tust uil wahe .
0,2408 so minnet dich daz livt .
0,2409 du wirst in vil livp .
0,2410 du redest suoze unde shone .
0,2411 so z ze houē zame .
0,2412 Min truot ioseph .
0,2413 gote muzzest du sin lib .
0,2414 du bist daz wahsende kint
0,2415 des chint nine svineot .
0,2416 sver dich ane sihit .
0,2417 mit rehte er gehit .
0,2418 daz in aser geburte .
0,2419 nine shoner man wurte .
0,2420 daz dev wip besainten .
0,2421 do si sich über di burcmure laineten .
0,2422 unde si mihel uirewizze was .
0,2423 daz so shone was din uahs .
0,2424 wande du ware aller .
0,2425 alzoges ane laster .
0,2426 do man dich uurte ueile .
0,2427 an dir ne was nehein meile .
0,2428 di heren iuncfrouwen .
0,2429 ilten dich beschowen .
0,2430 ir nehein was so wolgetan .
0,2431 des mohte si wole wunder han .
0,2432 uzen unde innen .
0,2433 ware du uol gotes minne .
0,2434 des in inkulte du heime .
0,2435 do dich hazzoten dine eigene .
0,2436 din eigene mage .

0,2437 huoben dich ane ir gebage .
0,2438 der nit was uof dich groz .
0,2439 dich gi ane manec scoz .
0,2440 do gestunt din poge .
0,2441 an deme alwaltigen gote .
0,2442 der zebrah daz gebende .
0,2443 diner arme ioh diner hende .
0,2444 Uon deme wirt geborn .
0,2445 der ze hirte ist irchorn .
0,2446 uber al den livt .
0,2447 der gote sol wesen liup .
0,2448 der ist ein sehender stein .
0,2449 der bringet z abende sin uihe heim .
0,2450 Got genade dir ioseph .
0,2451 noh ne uirzihe mir niht .
0,2452 sin heiliger segen
0,2453 si uber al di du sculst phlegen
0,2454 al des an der erde .
0,2455 wahsentes unde lebentes werde .
0,2456 deme ne werre hizzze noh frost .
0,2457 schur noh suht .
0,2458 livte ioh uihe .
0,2459 pern dir wucheres uile .
0,2460 Nach dines uater segenen
0,2461 muzest du gemegenen .
0,2462 unde aller diner uorderen segen .
0,2463 muze uber dich chomen .
0,2464 noh ir zerinne
0,2465 under dineme chunne .
0,2466 unze chome der wille .
0,2467 der ewigen puhele .
0,2468 daz sint di uursten .
0,2469 di sit adames wurten .
0,2470 patriarche unde wissagen .
0,2471 di wir ze den heristen scul haben
0,2472 wande si in ir guote .
0,2473 gingen uur ander livte .
0,2474 des sint di gote werden .
0,2475 sam di puhele ab der erde .
0,2476 di des i gerten .
0,2477 des si got gewerte .
0,2478 daz unser crist chome .
0,2479 unde si deme tifel bename .
0,2480 der hovbet sis tu ioseph .
0,2481 in guote ioh in gerihtecheit .
0,2482 unde aller di got meinen .
0,2483 uon nuo unze in ewen .
0,2484 unze an den gotes sun .

0,2485 der sol dich statagen .
0,2486 an deme wirt ovh gesehen .
0,2487 welich din segen si .
0,2488 Sun min der lezzest .
0,2489 du ne bist der wirsiste
0,2490 noh der beste .
0,2491 ich meine dich benyamin .
0,2492 du noh hast wolfes sin .
0,2493 den rovp izzest du fruo .
0,2494 den rovp teilest du spato .
0,2495 z erest du der ahtest .
0,2496 di du after male trostest .
0,2497 di du ungerne flusest .
0,2498 so du si gerne nerist .”
0,2499 Do iacob
0,2500 sine sune uolsegenote .
0,2501 do begreif . in der tot .
0,2502 er hiz sich peuelehen .
0,2503 zu sinen forderen .
0,2504 da abraham ioh sin uater ysaac .
0,2505 da sara unde Rebecca ioh sin wip lia lach .
0,2506 Der heilige man .
0,2507 da nah den ente genam
0,2508 div sele uur ze genaden .
0,2509 zu sineme anen abrahame .
0,2510 da wart er sare .
0,2511 sines uater ebenherre .
0,2512 des guten ysaaches .
0,2513 wart ebensazze iacob .
0,2514 da sizzent si alle dri erliche
0,2515 in deme hymelriche .
0,2516 alle di dare choment .
0,2517 in ir scoze si si nement
0,2518 da uirgezzen si schire .
0,2519 uil maneger sere .
0,2520 di si manege stunde .
0,2521 liten in disme ellende .
0,2522 Daz ne sule wir so niht uirnemen .
0,2523 daz si alle in ire scoze megen nemen .
0,2524 Abraham quit rawe .
0,2525 ysaac frovde .
0,2526 iacob heizet israhel
0,2527 daz sint zvene namen uil her .
0,2528 iacob quit underslufare .
0,2529 isrl’ got beshoware .
0,2530 Sver den tifel underslufet .
0,2531 so er in besvichet .
0,2532 daz er mit pihte . ioh mit riwe .

0,2533 suchet di gotes triwe .
0,2534 unde er ime sende in den muot .
0,2535 daz er da nah wole tuot .
0,2536 unde des nimer rewintet .
0,2537 e er den lip uirentet .
0,2538 der hat mit abrahame
0,2539 di ewigen genade .
0,2540 mit ysaac frowde .
0,2541 mit isrl' gotes beshovde .
0,2542 der mac iehen .
0,2543 daz ime wole si geschehen .
0,2544 Do ioseph gesach .
0,2545 daz sin uater uirendet was .
0,2546 er uil uber in .
0,2547 mit riweclichen gebaren .
0,2548 er winote unde wuofte .
0,2549 unde chust in uile suoze .
0,2550 er hiz in mit sabene bewinten .
0,2551 belegen mit bimenten .
0,2552 In deme flize waren si alle .
0,2553 uirzech tage uolle
0,2554 di lantlivte .
0,2555 durch iosepes libe .
0,2556 heten iacobes clage .
0,2557 uollen sibenzec tage .
0,2558 Do der chlage zit irginc .
0,2559 do bat di herren ioseph .
0,2560 daz si deme chunege sageten .
0,2561 wi in sin uater besvorn habete .
0,2562 daz er ime daz tate ze libe .
0,2563 daz er in da ze lante begrube .
0,2564 svenne er in da betrorde .
0,2565 daz er wider z ime cherte .
0,2566 Der chunic in gewerte .
0,2567 also er gegerte .
0,2568 Alle di herren .
0,2569 ioh di d altesten waren .
0,2570 furen mit iosebe .
0,2571 durch sine libe .
0,2572 sine brudir mit in .
0,2573 ir uater beuelhen .
0,2574 Div menege was uile grozlich .
0,2575 div pivilde wart erlich .
0,2576 e der piuilde siben tage .
0,2577 waren si in micheler chlage .
0,2578 Do si n begruoben .
0,2579 widere in egyptu- si furen .
0,2580 Sine brudir forhten .

0,2581 daz si inkulten
0,2582 wider in der alten sculde .
0,2583 unde baten siner hulde .
0,2584 daz er durch sines uater willen
0,2585 sinen zorn lieze stillen .
0,2586 vnde in uirgabe .
0,2587 di grozen missetate .
0,2588 der si an ime heten getan
0,2589 do si in uirchovften .
0,2590 Ioseph weinote .
0,2591 er hiz si sin mit guteme gemuote
0,2592 si ne dorften in forhten .
0,2593 er ne wolde niht ubeles an in wurchen .
0,2594 er chot daz si durh ubel taten .
0,2595 daz daz got ze guote braht hete .
0,2596 er chot er wolte in helfen .
0,2597 ioh ir wiben ioh ir chinden .
0,2598 al daz er in gehiz
0,2599 uil war er daz liz .
0,2600 Do er do alt wart ze war .
0,2601 zehen unde zehenzec iar .
0,2602 unde er do uirstuont .
0,2603 daz ime nahote der tot .
0,2604 do hiz er ime gewinnen .
0,2605 sine chunnelinge .
0,2606 Do si ime chomen .
0,2607 er bat daz si ime uirnamen .
0,2608 “after mineme ente .
0,2609 bedenke got ewer ellende .
0,2610 er nimet evh hi .
0,2611 mit siner crefte .
0,2612 des n ist zvifel nehein .
0,2613 er bringet evh wider heim .
0,2614 zu deme guten lande .
0,2615 daz milche iovh honeges ist flizende .
0,2616 des swr got der gute . abrahame
0,2617 unde ysaac unde iacob .
0,2618 So ne sult ir min gebeine .
0,2619 hi niht lazen eine .
0,2620 ir sult iz mit ev fuoren .
0,2621 heim mit der erde betroren .”
0,2622 Do er z uolleredete .
0,2623 niht langer er ne lebete .
0,2624 man chlagete in sere .
0,2625 unde beualch in z ire .
0,2626 des n ist zvifel nehein .
0,2627 sin sele si hevte got lib .
0,2628 daz muze si sin .

0,2629 nu unde in ewin .

0,2630 aMEN .